

據梧詩集



之詩亦然詩自三百篇離騷而下有漢有魏有六朝有三唐有宋有元有明有今海內稱詩家其不同也猶夫竅也其音之洪纖高下正變清濁剛柔擘緩促急和平嗷吽之不同猶夫竅之聲也而要其緣乎情沿乎法各鳴其曾之所欲言而扣之而成聲則無不同不成聲不足名詩予怪夫百餘年間談詩者之日陋也主漢魏三唐者詆宋元人詩曰傍門曰小乘主宋人者詆前之所作曰贗曰勦甚則怒其子孫乃并其祖父而訛之波流雲擾詆謫蠹出不惟其是之折衷而規規焉分流派別異同以蘄其勝而後已譬三尺之童子截六寸之管中

空而吹之偶得一二聲終身守之不變且號於人曰吾之聲可使景風翔慶雲浮吾之聲雖師曠之清角鄒衍之吹律無以加噫其陋也予以謂詩顧其成與不耳成則皆足以傳而流派異同固可亡論青村之詩初喜劒南近乃喜讀少陵大要能自鳴其曾所欲言而扣之而成聲者進而不止則其詩之必傳無疑予學詩三十餘年詩亦屢變今老矣愧未有成顧屢能言之青村將以予言為轂音乎哉青村家世貴顯齟齬即從觀察公宦轍南北萬餘里身所更歷事多故才練而氣和筮仕有能聲駸駸以功名著而予序青村詩乃第與之論詩云

此處為書中正文，因字跡模糊，內容難以辨認。

任李氏珍藏

柏軒草序

昔歐陽公喜與人談政事不及文章謂文章止能潤身  
政事乃能潤物其說不然宓子賤鳴琴而單父治言遊  
在文學之科而武城更化絃歌稱焉文章政事烏在其  
判若楹莛也詩雖文章之一事然古者輶軒所至必採  
風以知民俗之貞淫政事之得失省方觀牧陳詩與納  
賈俱以觀民所好惡焉後世風雅衰息吏始以簿書期  
會為能間有解韻語者不以為廢事鰥官孰分聽之矣  
青村令君毘陵世胄也其曾祖暨外祖父俱為衙門前  
輩風流詞采猶在龍山海曲間青村乃獨起而為令蓋

具館閣之才而小試之以潤物者也干越子枌榆舊邑  
頻罹兵燹土曠人稀青村下車以來煦濡撫字民氣日  
以蘇廉聲震焯自臺司以及鄉大夫無不交口以爲賢  
青村之悉心政事如此宜於潤身具不暇及之矣乃自  
退食餘閒登覽山川咏懷往蹟落筆成吟不覺宦橐之  
虛而奚囊之常滿也予以省視先世墟墓屢過清署愛  
其雙柏亭亭謂可爲令君憲府之徵而亦卽他日無忘  
甘棠之佳話唱和成編令君並以柏軒草屬予序予舟  
中伏讀其古體攔入漢魏近亦齊軌三唐清新輝艷則  
初日芙蓉也典雅弘麗則明堂清廟也令君聲譽騰蹕

行當游登

禁近賡和柏梁之章而吟曉風殘月之句與曾祖外祖  
父後先濟美豈止以茲帙當於薦已乎然則潤身潤物  
判若楹筵歐陽公果未爲定論矣康熙三十年秋七月  
楚黃張希良序

修琴閣集序

投耒鄉關擔簦京洛輒塵沒蹠無聞倚筑之聲芒屨穿  
跟自笑空囊之澀絳幘敲枕誰識掃門舍人席帽吟鞭  
驚避呵騶京兆則有西清學士東壁儒宗落落詞高飄  
飄意遠餐錢分給祇償借書之瓶釀具麤營每致蒯緱  
之鉞觥籌紛錯無非謝樹森森塵拂縱橫盡是庾風奕  
奕丰神瀟散瞥逢擲帽兒郎睂宇非常重睹褐裘公子  
亟移牀而近止安得此賢姑參語以試之果稱小異設  
竿掛犢居然林下阮咸列炬鳴鴉不類侯門杜位投我  
雲霞一軸屬之月旦片言如療飢而擷玉山之禾似愈

瘡而展輞川之帙體裁畢具俱證宏淵品第難施略陳  
梗概樂府屏呼豨之跡不同抵掌衣冠長篇爲變徵之  
音迴異引喉邪許五言璧合劉文房自折偏師七字珠  
聯許用晦坐劇全壘若其曼聲激宕謾謾延松下之風  
遠旨霏微曖曖破雲中之月贈言而便娟悽惋瑤華吐  
蘭萐之芬述志亦頓挫悲涼練景挾星虹之氣時而瀏  
連節序殆涼燠之變自文絃間乃緼藉風情擬悲喜之  
移於秦唱使才堪分授何止藝了十人况思復通神未  
見晷逾一寸且以子長適越每儲文筆之奇道濟浮湘  
更得江山之助趙丞相讀書巖畔鳧影踰躑陸居士淪

茗池邊琴聲響答宅畱雷令吟成虎氣龍身廟署康郎  
弔古苔槍土鏃潯陽送客亦著蘆花楓葉之篇彭蠡懷  
人詎無石鏡松門之句吳鉤剗兕何辭屢試批根軒鑑  
盤龍不惜頻持遐照潘河陽之樹花已徧筆更舒葩郭  
通泉之室劒長鳴文仍淬鏗築金臺上箋翻百幅蒲桃  
裂帛湖頭穎禿十牀翡翠品其才藻允江夏之譽無雙  
詮厥篇章卽吳公之計第一云爾癸酉旦月中澣華亭  
同學弟張淵序

天外集序

詩三百篇非徒草茅坐誦之物蓋將用之以達於爲政也然而嘯詠山水吟弄風月與簿書期會之事迴不相謀此嵇中散所云一行作吏此事便廢良有以也且唐之劉柳無稱於事業而姚宋不見於文章彼四人者猶不能兩得況下此者乎乃武進管大令青村敏於爲政而以能詩聞青村世家子富文學以彼才地何難取貴仕乃屈而烹小鮮於黔之普安雖有倚天長劍無所用之五年中得詩如千首因以天外名其集而請序於予先是予撫江西時青村爲餘干令三善賢聲如沈度予

賞之固不以詩也而詩又工大抵根源少陵繁枝衍派  
於蘇陸之間文章政事兼有其美豈易得與或曰潘孟  
陽飲酒遊山幾廢公事賦詩將無同是大不然昔河陽  
栽花彭澤種秫王夷甫爲元城令終日清談而縣務自  
理皆不失爲賢令青村遠宰荒徼政有餘閒感時觸事  
發興摛詞以自寫其幽渺鬱勃之思不惟無妨於政而  
已集中如觀象歌點夫行索夫謠鷓鴣灘紀事夜觀燒  
山諸篇直可與少陵天育驃騎歌石壕吏柟樹爲風雨  
所拔歎相頡頏其有悲天憫人憐才恤下之仁可知矣  
詩雖無多之數篇已決可傳且古人佳句如王文海蟬

噪林逾靜鳥鳴山更幽當時以爲文外獨絕蕭仁祖芙  
蓉露下落楊柳月中疎邢子才稱其雕章間出卽一二  
語膾炙千古不在多也彼皆風雲月露無關政體尚以  
工而傳况青村諸作上繼少陵有不爲採風者所首錄  
哉今補銓瑞州之新昌新昌故山水窟公餘休暇吟章  
益多將必得山川之助鼓吹休明以達於政政成之日  
予將含毫濡墨大書其報最之奇也綿津山人宋犖撰



圃華集序

蓋二十年前見青村於京師已耳熟其詩迨青村官餘  
干有集問世適從友人處遇之雖未卒讀知其詩益工  
且富今辛巳春與青村連榻京師者二月得細觀近作  
兼聞其論詩乃知青村之詩其才大抑其學尤深吾聞  
詩號能窮吏常苦俗之二說者以視青村正不其然然  
則青村之取於世厚矣或乃更爲青村惜曰若君者何  
難一第而遽以仕顯得毋有遺憾耶噫此未爲知青村  
者科目始於唐而有唐科目之弊亦已極矣詩如李杜  
對策如劉蕡不得爲進士其進士者若伯玉不免以

琴摩詰不免以琵琶亦可哀也爰至果頭之禍遂以亡  
唐李贊皇曰好驢馬不入行雖有激言之要不失大丈夫  
語若今之白鏹錦衣掃門吹竽毋論縱或一寒如此  
其中亦何有青村固不爲耳非不能也前明楊文貞公  
一代名相猶以未曾作令爲恨蓋縣令親民周知便而  
興除易當也夫子言誦詩必達於政今青村爲令而長  
於詩必能以詩爲令然則青村有以行其志矣雖然青  
村之詩高秀雄卓令未足以盡之吾知青村之令亦直  
寄焉或曰青村爲令十餘年足跡幾半天下江山之勝  
入其胸次故其詩益工且富然則青村又以令爲詩也

同里蔣金式序

據梧詩集目錄

卷一

吹萬集上九十六首

卷二

吹萬集下一百一首

卷三

柏軒草上七十七首

卷四

柏軒草下七十五首

卷五

修琴閣集上五十八首

卷六

修琴閣集下一百首

卷七

鷗馴集上九十七首

卷八

鷗馴集下六十九首

卷九

天外集上五十一首

卷十

天外集下七十二首

卷十一

圃華集上八十七首

卷十二

圃華集下七十二首

卷十三

寓壁稿四十四首

卷十四

寓壁稿六十二首

卷十五

寓牒稿六十二首

御製序沈德潛國朝別裁集 選首匡廬歌 管掄字青村江南武進

人官師宗州知州

又 江左十五子之一

據梧詩集卷一

吹萬集上

東園

小雨桐花落。輕風棟葉肥。樓高宜近夜。香散欲侵衣。紅藥翻階豔。黃鸝轉樹啼。魚鱗鷗狎浪。相得是忘機。

胡芋莊香草菴次韻二首

豈是騷人舊卜居。名山河處不吾廬。年華地僻兼心遠。生事茶香復酒餘。白鶴胡安千古業。玄亭揚子一牀書。紛敷花藥盈畦豔。不羨揮金但荷耡。

山深深處是何人。九畹芳花楚客紉。縹架但教書帙麗。  
壺盧不放酒樽貧。浮沈莫問當前事。寵辱何來物外身。  
可愛小園工賦筆。蘭成風景最相親。

子夜歌三首

楊柳惹風吹。一絲千萬縷。妾身如楊柳。一心千萬緒。  
阿那舞身輕。鞦韆持百索。臨上故遲遲。春風斷魂魄。  
盡夜理秦箏。箏急不成調。歌盡扇底風。夜深持燭照。

雪用坡公韻二首

兔園瓊樹散昏鴉。洛水凌波姑射車。小院風迴如意舞。  
清宵雨雜不成花。千畦高下瑤爲圃。萬瓦參差玉作家。

一樹寒梅香未破。蝶飛已上雨了又。

綠甕冒棟晚廉纖。寂寂窮廬夜正嚴。嘗酒滑鴨煨楮  
煎茶加味雜薑鹽。捩髭一老詩憑閣。戲玉羣僊冰插簷。  
到眼兩峰真幻絕。瓊瑤貼地碧螺尖。

觀碁六首

小閣香籠燭未闌。玉楸枰暖辟重寒。碁經一著爭先處。  
鼎足三分布算難。

姑婦中宵立語奇。聽來真訣世無師。王積薪事陰平道險絕。

兵日冷著斜飛人未知。

覆局收碁斂手前。神完中恃一軍全。不觀風急舟幾覆。

失卻西南半壁天

破荻為枰不肯休巧名新得號忘憂

祖挺以棋為忘憂

當場卻

報臨關敵急劫多因賭廣州

鸚鵡揉枰終巧佞

姚泊事

康猶亂子覺嬌嗔

太真事

誰

知一失漁陽著十萬潼關敗局陳

豆剖瓜分誇割據巧謀計奪亦稱雄從來得失原無定

勝負須看到局終

野望

策馬西山過楓林葉漸荒千頭垂橘柚一樹半青黃  
鴈起風橫野砧寒月挾霜蘆汀秋瑟瑟易起別情長

效唐人本事詩四首

長信宮前花滿時水精簾下鬪腰肢金環新博君恩寵  
手詔陪遊太液池

烽連六詔陣雲黃銅柱懸崖歸旆長萬里蛾眉衝驛至  
充華新署自昭陽

珠啼霧唾月痕斜金屋春深護絳紗零落長門怨秋草  
何須竹葉引羊車

景陽宮殿暮棲鴉塘外輕雷走鈿車三十六宮秋草碧  
就中何處月光華

登鈔光閣晚眺次合肥龔宗伯壁間韻

雲奇多極目小閣鎖輕陰暝色侵煙潤山光帶雨深臺  
荒悲駿骨梵響靜冰心欲得滄洲趣幽期自可尋

佳人絕代生

佳人絕代生明眸發皓素生年未及笄雙璫響珠樹門  
楣閨闈家綺紈安足數稽男憐未成左女字相呼綽約  
擬瓊花刺繡描鴛鴦東牀選妙才對結同心固寶鈿登  
香車珍珠重貽賂羅錦滿篋笥蕙蘿願永附夫壻爲蕩  
子棄我如遺路俠客醉凌晨娼樓宿春暮呼盧喜一擲  
千金多不顧深閨獨夜眠蛾眉不敢妒妾身忍棄捐多  
爲媒妁悞空牀虛錦衾銀釭燈一炷遂使二豎侵難以

七發喻呻吟牀第間恩情誰可訴欲訴每囁嚅薄言逢  
彼怒閒讀白頭吟試詠長門賦譬如芙蓉花妖豔色初  
吐秋風昨夜驚吹作香煙霧粉黛長年絕命薄如危露  
不觀田舍郎十斛麥重娶豈知古有言新人不如故

題畫

橫空煙雨滿山谿天半秋巒望欲迷我夢江南風景好  
墨花先向此中題

中秋前一夕長椿寺閣望月

夜逼秋逾迥天空月未圓禁鐘高閣得佛火梵聲傳懷  
抱思難著江山憶渺然憑欄一長望孤鴈落城邊



秋宵刻燭行爲周蓉湖檢討賦

名都才士悲秋客，執手欣逢話疇昔。霜信初寒楓葉丹，露華暗冷深林白。主人綺筵相爲開，傳鉤射覆醖新醅。座中才思竝八斗，意氣磊落無塵埃。酒闌倚劔共擊缶，詩卷翩翩逢快友。興劇分題刻燭時，斗酒百篇稱未有。淋漓翰墨發幽光，瀟灑襟期探二酉。落筆真能神鬼驚，揮毫疑似龍蛇走。西牕剪燭忘形交，月黑風微夜影遙。龍眠老筆傳好手，十指繪畫開生綃。漫漫秋夜應何極，痛飲狂歌真未測。氣酣直上千重雲，思遠遙乘萬里翼。太史聲名重木天，琳琅詞賦搖綵筆。君不見香山賓客

盛風流南皮勝事誇同遊，拂卷鵝溪開數尺。蒼茫夜色逼深秋。

畫菊題爲友人壽

三徑霜華又一時，餐英別圃楚人思。因君勁節高難擬，寫出東籬菊幾枝。

過南郊禪寺

行藥城南步屨幽，瓜畦竹圃恰深秋。未風樹已連平野，欲雨雲先動釣舟。晚食齋鐘初出谷，客來茶磬入高樓。歸途好趁殘霞影，燈火蕭疎月半鉤。

癸亥歲除前七日爲立春後五日周文邑自畿南

至都留飲寓齋漫賦

荒齋剪燭話重逢  
飲狂吟夜未中  
拍盞燈搖今夕綠  
入春花發去年紅  
已過舊曆兼新曆  
自覺東風競朔風  
轉憶冷煙殘雪夜  
嚴城獨自遞疎鐘

水僊

春陰薄醉晝漫漫  
煙態難勝露未乾  
五里香浮花作霧  
三更燈暈玉生寒  
含葩矮墮垂雲髻  
剪素敲斜綴蜀紈  
栩栩蝶飛清夢遠  
醒來疑作縞衣看

北郭移居二首

數家雞犬似江村  
新漲初來沒舊痕  
老樹倚雲連渡口

平橋貼水隔溪門  
朝饑有帖虛求米  
暮冷無衣不解溫  
爲問考槃惟此適  
拚將萬事任乾坤

負郭微流水不湍  
柳陰高復臥河干  
閒尋積券俱因酒  
護惜春花怕損寒  
乍霽月生雲意妒  
多愁身窄醉腸寬  
幽居自有關身事  
那許春來一枕安

月夜泛舟白雲渡同毛匏村賦五首

綠暗驚看柳幕遮  
愁來酒思儘堪賒  
百花過盡春歸去  
畱得餘寒開棟花

踏月歸時夜已分  
柳斜深巷靜無聞  
誰將小艇畱明月  
渡我春溪到白雲

新添春漲沒青蒲月樣微波似欲無  
華子岡頭如豹吠  
分明身歷輞川圖  
天空長嘯白雲間  
樹影微茫入小灣  
今夜月光同水色  
前溪應有醉人還  
官柳春深缺一隅  
冬來擬種兩三株  
濃陰遮護君須記  
可似陶家五柳圖

岳武穆墳

武穆墳邊送遠暉  
松楸煙冷鎖朱扉  
山川不爲當年改  
風月應知舊事非  
北征將士血濡甲  
南渡蒼生淚溼衣  
回首曩時堪一慟  
暗風吹雨又霏霏

吳山晚眺

莽莽浮生醉復醒  
吳山東望跡初停  
征帆未落已殘照  
小艇欲歸猶戴星  
吞海喧豗千頃碧  
隔江依約兩峰青  
那能一枕高樓臥  
回夢潮聲入夜聽

小畱杭州因雨不得至湖上

高臥荒樓對郡城  
浮雲時傍隔江生  
一詩欲破千重障  
半月來無兩日晴  
悶取楸枰觀世故  
閒將書卷伴離情  
客愁飄泊何時了  
欲倩東風斷雨聲

過朱買臣墓

樹古苔荒沒廢煙  
會稽連守至今傳  
功名老去還堪信

妻子貧時亦棄捐故吏奔看持綬去舊山聊落負薪還  
人生窮達尋常事捫罷殘碑一愴然

雨用少陵韻

涼思遙天起同雲驟雨生危樓時極目高枕靜移聲疊  
嶂含煙失平橋入水明客愁無倚著拖屐過春城

漫成

作箇重陰徧野齊煙隨春樹望中迷須添小艇橫橋畔  
款乃聲聲過水西

莊南星中表手時盆荷荷已華矣賦東

尺藕生梢手自栽蕭蕭打葉淨無埃翠分北郭高人供

種自青  
山乞來

晴帶西湖曉日來

適自湖  
上歸

好夢勾回知雨過清

香無際覺花開小詩擬荅盆池惠一片雲從頭上催

澄江旅舍

譙鼓連三疊端居隱半瓢白分煙際潤青入暮山遙野  
色迷寒樹風聲送落潮年來惟一枕萬事就中銷

野步二首

鴉陣橫空蔽夕陰薄寒新月上衣襟霜林昨夜來風信  
葉落街頭一尺深

萬木蕭森獨掩門了無人影到黃昏羣鵝日暮歸欄去  
行過溪頭亂夕雲

燈詞八首

別館東風巧剪裁吹成五日落寒梅天工苦為遲春信  
火樹銀花一夜開

猩色屏風詰曲迴寶燈紫府六時陪僊禽梵鳥紛紛見  
忍草天花處處開

清時幸受一塵氓十畝閒閒少俗塵何處春風吹化雨  
帶牛佩犢已無人牛燈

懊儂歌罷夢魂迷調撥箏琶和馬嘶恍似交河邊月黑  
霜寒千騎渡安西花奴戲扮  
出塞事

濯船解水有吳兒八幅蒲帆影漸移綠水紅橋好風景

半篙春雨鷺波時

船燈

瑤璃殿畔市燈開窶數呷牙莫謾猜笑我前身饑朔是

射盃曾向漢宮來

都下有燈  
謎之戲

暖律條風上苑新地空天近易生春當年走馬晴街裏  
夾道香煙散麴塵

殘杯餘暖覺春妍燭淚成堆夜影偏往事不堪重記憶  
燈詞還唱十年前

荅南星贈梅

十日春光凍未舒巡檐何計破春初館娃宮裏香風散  
吹向林逋處士居小梅自姑  
蘇攜來

坐雨

看徹人情總自如一椽之外已無餘兒因食菜頻傷瘦  
客以耽書每覺疎酒熟閒愁都破卻春來俗事半消除  
孤牕此日幽懷愜聽雨焚香讀道書

玄墓看梅五首

片帆風正榜舟行羣玉峰頭相送迎細草沾泥苔路滑  
漾波醮岸接堤平數家臨水墟煙冷一徑穿雲薄靄橫  
到處尋春春未見東風先滿闔閭城

春光初入靜無痕姑射仙人暗返魂殘雪半篙重蕩槳  
癡雲四合卻當門香風作霧疑無路短竹圍籬又一村

時節減衣春尚淺不知花信幾多番

羅浮春雪暖初融閨苑行歌曲未終但覺春從香雪裏  
不知身在亂雲中三山玉宇人間隔一水銀河天上通

日暮前村歸路晚此花應笑客怱怱

席地幔天起白雲路人猶說董家墳墓前翁仲默無語  
山上黃鴉時作羣月落松楸還歷歷春來花鳥漫紛紛  
何人解作傷春句天際斜陽已夕曛

千林春雪作香庵欲向彌陀共佛龕浮水數峰還一一  
雲堂聚講卻三三朱橋宛轉隨流澗萬笏參差照夕嵐  
日暮橫雲山下路東風取次爲先探

虎山橋之東別墅名岸船境頗幽麗花間紀所見

二首

萬壘重雲巧護舟斷橋煙雨最關愁  
虎山溪畔茶山路  
一夜東風盡白頭

風生紕縵最宜人雲影波光動曉春  
寒著五銖花下立  
不知誰箇是真身

玉指環用楊鐵厓寄王允原韻

宿霧初收上翠茗樺煙如霰隔昏朝  
半攏絃促難調瑟  
爲怕寒侵怯弄簫細數歸期應屈指  
閒挑樣本欲舒腰  
東風正袖柔萋美捲上珠簾第幾橋

清明日野行用陸劍南山家韻

雨漲陂塘春水渾數家依約聚雞豚  
行逢野老如相識  
路入圍籬不辨村花斂日移寒意淺  
柳斜風靜溼煙存  
臥聽穀穀黃鴉語草冷灰飛集墓門

錢三首

萬事由來賴此翁任人奔走逐西東  
就多去少藏身巧  
轉地旋天作計工竝列五財雖稍遜  
蚤營三窟若而功  
韓公藉此供文耳名託儒生敢送窮

直百當千萬事移酸寒那計得常持杖頭贈有蘇司業  
囊底畱同杜拾遺金鴨暖侵銀葉候奉恩賜出洗兒時

書生自揣無須此榆莢牆東綠滿枝

子母圓旋總化生忍教撲滿一時傾何方作術能驅鬼  
有事頻呼不任兄市物平章還執柄僮奴愛護得真情  
饒他京國多豪貴神武懸冠已退耕

末句近事

閒居二首

悠悠殘夢度年華歷歷香塵走鈿車薄霧低迷纔障日  
微風斷續不吹花長年酒券裝成帖四月街頭未賣茶  
取次情懷非作惡輕寒無賴篆煙斜

江郊隱隱響輕雷似爲東皇著意催雨細魚行排隊密  
風多燕壘護雛回忽驚紅落知春晚漸老鶯歌識夏來

喚起五更幽夢破衝寒先爲報花開

客遊西江次錢亮功中表送別韻四首

遮門荷葉製爲衣呼友攜尊爲發揮花雨一簾春晚晚  
江山六載夢依稀輕風颺浪魚兒浦細雨回颿燕子磯  
忽漫裁詩吟徹夜亂雲應傍櫂頭飛

十年歸臥水雲鄉遶郭清流下貢章多恐曲終悲白傅  
急須風便借滕王東林鐘動溪雲白西塞山寒江月黃  
被酒漁村愁獨夜獵徒釣侶最難忘

極目江天水勢肥楚歌自昔怨湘妃寒潮蕭瑟風來晚  
官舍春蕪樹幾圍客子重驚當日夢居人還挂舊時衣



憑高淚盡無揮處日暮棲鴉挾子歸  
五兩風輕揆柁牙長巒逶迤走平沙閒依篷屋吹漁笛  
偶製新詞倚鳳琶雨急蒲叢喧鳥雀風腥山步賣魚鰕  
憑誰覓得吳淞絹爲畫江行落日斜

西湖竹枝詞七首

湧金門外傍湖堤十里煙光宿處迷每到堤邊渾不去  
踏船斜日過雲棲

桑葉婀娜艾葉長人家門巷半橫塘艾蒲如玉論筐賣  
桑葉柔柔下剪忙

逆槳迎風打櫂頭溶溶春水滑如油前山忽起空濛雨

細縠圓紋點點浮

短櫂蜻蛉去似梭櫂聲鴉軋蕩晴波吳綾織作千層皺

新雨融如一鏡磨

兩兩漁蓑一導鷗湖邊獨立數歸舟微波不受日光落  
變作玻璃水面浮

化億真身合百圍雨淋金碧送殘暉斜風急雪湖頭路

鎖甲閒拋著釣衣

大佛寺石像壯觀  
金剛衣以蓑笠

濠上同遊記昔年河橋酒舍每依然消魂今夜湖頭雨  
亂打枯篷到耳邊

去年同莊南  
星客湖上

韜光寺

雨霽峯猶溼黛痕日光穿漏下顏垣江潮北走排冰嶂  
山月東升浸寺門松鬣擎空疑遠嘯石峰凝翠看無根  
徘徊不記歸時路錯認炊煙過別村

富春道中六首

平生劇有尋遊興領取煙波一葉舟路入山迴潮不到  
月因人好夜常留曉看嵐影和雲白臥聽灘聲帶雨流  
忽過亂峰幽絕處恍如觸熱渡辰州

望處空山曉霧迷蒲帆八幅傍風低天如卵色雙峰合  
水作鞞紋一樣齊路曲竟須迷去住臺荒應不辨東西

東西  
釣臺

卻憐春鳥無情甚獨向山中盡意啼

白道絲長一徑斜空濛山色斷煙遮颿回絕嶂人如鳥  
風起平莎葉似花傍水霏微多釣艇臨流依約幾漁家  
新詩擬弔黃公望身跨扁舟到晚霞

扁舟野岸靜無聞兩兩黃鸝自喚羣雨增昨夜三尺水  
舟入空江千疊雲悠然志亦不在釣隱矣身將焉用文  
蟠藤怪木古碑側杯酒遠為酌斜曛

桐江嚴瀨以人高山水欣逢絕世豪江落灘聲如黯澹  
路圍山色入周遭魚鱗雲襯峰千疊鴨綠波平水一篙  
嫋嫋竹竿三十尺釣名何事徒勞勞

雨嫩如絲卻又晴輕風渺渺傍帆生山於臥看時方好

詩到懷鄉句裏成稚子扶牀初學語山妻倒指計行程  
乾坤豈自鳴懷抱石瀨潺湲瀉不平

雨夕舟中

細雨暗江磯如絲落又飛月昏山起霧風軟客添衣漁  
唱明猶隱人言遠欲稀掩篷愁絕處鄰火夜相依

舟行餘汗道中風日清美率爾成咏

舟輕水初漲帆飽風乍閒掩卷時成臥推篷卽看山雨  
來蘆葉暗日落釣船還煙際牛羊下柴門倚晚關

章江感懷

朝過彭蠡澤暮泊章江濱章江風雨惡煙水遙冥冥忽

憶西游輕跋涉三湘七澤時窮極炎風毒瘴過夜郎蛟  
龍潛盤水深黑巖雲百結浪盤渦日光磷磷少顏色飛  
鳶跼跼墮水中瘴雨朝來暗如墨其時行人慘不歡酒  
闌常歌蜀道難五年蹤跡多聊落撫膺往事增悲酸蓼  
莪廢讀傷懷抱憂思抑鬱還終老饑來驅我出門去手  
攜陶詩吟徹曉遠游作客苦思鄉那堪夜雨聲琳琅十  
日陰雲暝不收惡風吼浪兼天狂恐是蛟龍逆鱗怒張  
鬣奮鬣相爭拒又恐鯨鯢夜徙淵雷雨震蕩互吞吐獨  
客他鄉忽此時杯殘燭跋光熹微牀頭古劍深夜吼倚  
舷大叫稱絕奇君不見思鄉沈約兼多病庾信當年感

衰鬢悲吟擊柱歌莫哀江風淅淅淒涼甚

哀南州行

并序

憶戊申秋觀察公自詞館謫宦洪都曾卜宅於  
東湖之濱蒼涯一曲衡門兩版榜其廬曰楊子  
居采文石於西山疎清流於南浦堂前百頃澄  
波門外五株楊柳編枳爲籬修藤成架素馨盈  
幄都蔗爲鄉且致酒蘭陵探書禹穴一時名彥  
雲集高會置酒拈管襞牋吟諷纍纍傳爲盛事  
閱數年滇南變起會城兵馬蹂躪舊宅荒蕪而  
觀察公亦以一官萍梗十年之間馳驅萬里蠻

煙瘴雨艱險備嘗甲子春履任山左觀察甫及  
半年遽捐賓客痛哉今年秋檢重過南州一二  
故老猶能言之有至欷歔泣下者檢感事撫時  
一慟幾絕長歌當哭名曰哀南州行

章江風雨連滄溟空堂颯颯悲蕭晨擁燈兀坐不成寐  
撫今感昔涕沾巾形神悽愴話疇昔先帝侍臣稱逐  
客十月霜天吼朔風扁舟破浪來彭澤彭澤由來古盛  
名濁醪清句弔淵明積雪夜過樵舍驛衝寒蚤上灌嬰  
城奚囊襍被尚傾倒驚傳野火燒空燎席未暇暖寗未  
黔灰啼燼竄不自保盡室奔走聞號呼誰可託足惟東

湖風潭百頃徐孺宅喬木千章梅福居居門清絕稱楊  
子牽船補屋隨流水共道僊人白石樓誰知處士青門  
里西偏隙地作虛堂披襟對客歌大荒自古詩人羈異  
域由來遷客遍江鄉欽敬特地遙飛閣流丹層層天外  
落西山積翠來高城南浦微風動重幕長江雪浪奔如  
雷愛弟乘風千里來家聲孝友敦同氣入門握手無塵  
埃經旬風雨聯牀宿開書夜半擎燈讀三年一見抵瓊  
瑤弟勸兄酬須百斛春風詩酒真人豪拚將蹤迹混漁  
樵江州度曲白司馬東閣裁詩何水曹煙巒依屋開三  
徑酒旗歌板相輝映鱸魚時節水盈竿訊竹風懷花半

醒滕王高閣數歸鴻長天嫋嫋乘雲風隱士昔曾稱孺  
子因緣今已過韓公那知人事多興廢瞥眼風光如作  
戲洗馬池邊枹鼓鳴投書渚畔悲笳起全家相對盡倉  
皇鱸膾尊羹憶故鄉登閣最愁烽火近艤舟卻恐道途  
長嚴霜鐵騎來千匹征西將軍位第一河上逍遙白馬  
軍草間潛伏黃巾賊鄂渚烽埃鬼火燐青苔白骨久成  
塵萬里北來鴻不到一官南去冷如冰蠻鄉犵嶺長途  
惡瘴霧荒煙雲外薄鵲華峰前詔甫除馬嘶夜半驚星  
落黃河夜度泣孤舟馬鬣初封土一杯饑來驅人辭故  
里衝風逆浪來南州傷惶念昔增三歎亂莎野鳥傷空

館榷籬藥圃半無門垂藤僵柳還依岸舊時題咏已封  
塵當日松杉手澤存鄒枚客館傷奔兔庾信荒居叫斷  
猿白頭野叟猶能說回思往事沾曾臆空齋夜雨聲淒  
淒燭花暗結無顏色嗟乎荒城芳草空菲菲曲榭迴堂  
事已非惟有舊時巢燕子銜泥還傍主人飛

南康東周繡林郡守二首

山水憑空濶才人作宦遊破風千嶂曉經雨半帆收雲  
氣來廳壁湖光入郡樓清言揮玉麈炎暑倏成秋

邸舍追歡讌安南擁傳車枕榔秋雨裏格磔古城隅海  
外新遊紀匡山舊讀書鈞簾窗四達面面玉芙蓉

先生以儀

曹使  
安南

雨中短歌

章江夜雨連天沒寒雲漠漠行人絕城門達旦常不開  
水瀉斷厓杵臼缺牀頭積潦青苔浮人家避水上危樓  
休燈電影半明滅昏鴉挾子聲啾啾

山庵

鳥巢峰側嵌雲庵嵐氣湖光日日探招手行僧問廬嶽  
打包明日過山南

開先寺霧中望瀑布

疋練橫空千尺開山中日夜有奔雷但知聲在懸崖裏

不見水從天際來

山中日暮有餘光

林石幽奇入畫堂

山果半開香滿林

山事

杳然雷澤半開烟

水石幽奇入畫堂

山果半開香滿林

山事

杳然雷澤半開烟

據梧詩集卷二

武進管

榆青村

吹萬集下

遊匡廬三首

乍霽嵐煙溼未乾  
扶筇踏磴暮光寒  
松濤澗雨聲難辨  
野蝶叢花色一般  
衣上捲風霞片片  
峰頭縱目水漫漫  
山僧飯白抄雲子  
隔嶺相呼約共餐

春花春草漫紛紛  
野鳥相呼自喚羣  
暮雨來時山起霧  
空潭積處水如雲  
松高著子因風墮  
澗落飛濤徹曉聞  
天際諸峰無礙障  
和陶舊韻與僧分

碁聲滿院掩柴扉  
澗瀨霏霏人語稀  
野衲聞鐘衝雨去  
溪橋送客踏雲歸  
巖花暗落桐花帽  
敗葉時侵柵葉衣  
拾得墮巢供茗戰  
閒從石上看蛟飛

玉淵潭

飛澗落長虹  
山空響萬重  
祇疑風雨惡  
雲窟走蛟龍

蠡湖月夜三首

持酒倚舷歌  
水天同一色  
劃然長嘯聲  
風起不可測  
中天月影直  
四野雲衣生  
側耳不成寐  
鄰船撼水聲  
積雨雲未除  
雲氣逼人冷  
雲月相爭妍  
幻出此情景

沈選

匡廬歌

平明迎日上廬嶽  
春山滌翠清如濯  
攀蘿直上三萬級  
側身蟠走如飛鶴  
雲粼粼花冥冥  
劃然巨靈劈千丈  
瀉出萬派洪濤聲  
耳目蕩漾不能主  
恍若坐我於滄瀛  
滄瀛風雨不可測  
中有一人不相識  
手持銀管跨紫鳳  
授以琳琅五彩筆  
回頭笑指游空濛  
導余絳節雙玉童  
呼吸帝坐隨清風  
俯視一一金芙蓉  
白雲如絲滿空谷  
乘此欲與天庭通  
把酒酌煙霞素懷  
託明月明月與時滿  
煙霞無時歇  
拍肩笑問洪先生  
口吹玉笛銀河傾  
山中木葉蕭蕭響  
下界疑爲鸞鳳鳴  
襍戔授蕭史共飲  
白玉醴長觥傾  
倒慎莫辭醉眠  
石上呼不起  
白猿蒼鳥莫相



猜前五百年曾住此

山中偶書

山中猿鳥莫相驚五百年前舊主人太乙殿中曾宿直  
阿環窗下結緣因劉盧世係名存籍茅許親承訣是真  
淪落人間逐塵霧一筇常伴水雲身

開先寺

數日山中抵萬回緩拖藤杖到平臺空林落日見紅影  
近水懸崖盡綠苔密葉偶低知鳥過葛衣漸冷覺雲來  
老僧齋罷同行飯快看茶花一色開

蚤望五老峰

夜來春雨撥鷗絃曉起嵐煙最可憐似此好山皆是畫  
就中著屋可如船

山行

寂寂空山仄徑斜午風吹落紫藤花不須苦問山深淺  
篁雨松濤百道遮

寓樓坐雨

暝色寒光幾萬重掩書成臥小樓中鑪煙出戶依橫靄  
蘭蕊畱香待晚風雨傍斷雲過崦北草舒新葉溼牆東  
銀刀觸網新醅熟離緒如山一笑空

薦福寺納涼

寺閣崢嶸對夕林齋鐘不動晝沈沈湖明影落孤峰暗  
樹老風移十畝陰蟬爲秋來聲轉切花緣日薄色偏深  
閒愁斷卻惟供枕臥聽雲堂粥鼓音

浮洲晚飲

博得秋來暑氣清殘雲扶雨過高城星沈積翠吹皆起  
日落平山畫不成雪藕絲長歌宛轉白蘋花老露敲傾  
舉杯酷愛風來晚又向橋東待月生

阻風珠磯

羣山如螺髻過雨弄脩帔綠水如玻璃淪漪積深翠舟  
行隨浩蕩浮漚乾坤內倒景吞雲霞寒光互顯晦六月

暑氣清魚龍貪晝睡長嘯擊櫂歌臥待清風至雅志輕  
滄溟曠觀渺湖海前行不可測惡浪排空翅巨波含洞  
庭霧氣連蒼昧柁師失徑途顧視心欲悸謂須就此棲  
莫與蛟鼉試豈知天壤間萬事倏如戲稽首酹天公願  
以舒畱滯須臾風澹蕩舟子喜無似打鼓爭歌呼張帆  
渺無際

自珠磯發棹行三十里至左蠡復阻風和蘇長公

洪澤中途遇大風復還韻

朝迎暎日出暮逐落霞歸風捲浪如屋茲行計恐非魚  
龍中夜舞鳥雀不敢飛匡廬色如黛可望不可依低首

就篷坐逆鱗怒莫違北風聲正號中流櫓聲微近村黍  
酒薄連湖巨魚肥舟人三致詞向神默禱祈夜半不能  
寐敲火啓窗扉清冷暑氣少御寒欲添衣

阻風左蠡三日望匡廬

江雲吹浪似奔雷驚起魚龍陡舞回隔岸炊煙晴欲雨  
遶崖溼霧暝還開風連百丈濤頭卷雲暗千山雨腳來  
咫尺春颿斜日過手攜玉笛上平臺

蚤發左蠡

酒醒浪初靜波平鷗不驚半船微雨過雙槳挽風行古  
寺藏雲冷秋巖入曉明大姑山不遠猶隔片帆程

過五老峯下

松鬣擎空半樹枯肩輿臥看望中殊雲歸遠岫常吞吐  
雨起平山似有無沙水細流尋不見野花叢落點成圖  
何年穩結茅茨隱閒引山泉入蠡湖

蘄州雨湖觀荷攜酒如是庵竹下九首

畏熱炎氛裏薰風菡萏芳江雲籠曉日山雨作初涼河  
朔經旬會湖頭十里香名花兼勝友佳境足相羊  
蘄楚江山勝怡情愛雨湖晴霞波上捲月舫鏡中趨擊  
蓋連天翠承盤轉露珠晚涼幽意愜避席訝鷗鳧  
昨歲農家儉陂塘雪藕空花明初日上玉出污泥中鼻

觀香兼稻鴉夷碧注筒每逢行樂處暘雨願年豐

一道清陰遠涼颺竹徑中此庵千箇好屈指九人同客座

九人洗鉢香廚飯分盤小圃菘蔣君鹿馭真健者詩格寫清

風

岸落漁磯在前時曾侍遊河山傷舉目文酒逝波流怪

石披榛出儵魚滿鏡浮來宵明月下約放采蓮舟

歌愛吳娃好衣裁楚客香為憐詞綺麗來蔭佛清涼大

藏雷高閣微塵覩此方曾聽潛智院老衲話興亡僧談獻賊

破楚事

世上無支許林間枕簟清朗懷思刻竹友欲以八分書刻竹紀勝幽

響得流鶯款款花前意疎疎物外情新詩何地賦茅屋  
適初成

永日宜游衍山椒更水涯狎鷗嗔避席愛馬聽嘶花勝  
槩忘情得幽探著意誇碧雲庵更好忍草粲秋紗

自有賓朋樂何曾地寂寥人煙生半郭佛寺帶前朝老  
木參青靄清江渡野橋晚涼微雨過歸路不迢遙

江行感事二首

三日寒侵暑氣收又攜藤笈上扁舟平山積霧忽然失  
野水無風亦自流一枕新涼添客夢半生舊事屬江州  
不堪禾黍傷心地吹角城隅又蚤秋

絕嶂橫空一鳥回江聲不斷暮雲哀黃州木落冷歸夢  
赤壁秋清寒酒杯出水魚肥論網買入雲山遠帶晴開  
自傷蹤迹遊僧似破衲飄然任去來

黃州聞鼓角

星河澹欲傾鼓角動高城冷與秋俱至悲同水作聲鴈  
橫空轉急砧續遠猶明回首銷沈事爲予一訴情

牧牛兒

牧牛兒跨牛歌扣角和朝隨暎日出牛散滿山側辨色  
逐羣行安性隨所適榕陰風微微解衣臥牛衣落日牧  
笛哀牛行四山來牛歸欄底宿家在牛欄北

猛虎行

山南白晝猛虎來柴門竟日常不開村東少婦血漬草  
村西老翁骨成堆官府明文下獵徒村舍奔走相號呼  
入門不顧索雞酒由來苛政猛於菟亦毋張爾弓亦毋  
亡爾鏃明朝羣起頌相公虎畏相公渡河北

武昌晤西泠錢季苾次韻奉荅六首

布帆初落斗杓寒楚客相思解佩蘭高閣斷虹痕似溼  
輕煙移樹晚初乾囊無長物難成癖枕有奇書肯借看  
自笑薪蔬惟計日誰令菜把仰園官

陶庾遺傳自昔年風花幾度候如煙雲迷北渚湘天畔

雨暗春帆漢水邊橫笛已無聲入座斷碑猶記迹留賢  
君看官柳垂垂老衰落今能值幾錢

裁詩屬和遣童催好句何曾賦落梅笛裏新詞訴幽怨  
夢中舊雨盡餘杯禪關習靜兼旬隱藥裏封題寄遠來  
夜半敲燈依險韻山村雲閣首頻回

漢水兼天柳合圍江郊盡日啓柴扉迎船蘆葉當風急  
收網漁舟趁晚歸月落夜溫名士酒夢回秋冷羽人衣  
高城河漢縱橫瀉溼草依螢墮復飛

憶昔西行犵嶺鄉醉呼潮起各飛觴寒濤送雨來湓浦  
絕嶂牽船入夜郎澗草萋萋隨目遠閒愁漠漠抵江長

明朝馬上聞蘆管可憶城南市酒香  
惆悵當筵子夜歌碧空如水晚涼多柳煙當暮忽成色  
江漲無風亦自波天末鴈橫書北至橋村砧起鵲南過  
酒酣細數從前事雨打燈昏奈爾何

蔣玉淵以馭鹿圖索詩

我昨廬山遊山空雲縹緲炎風蒸菌露溼翠香嫋嫋橫  
峯石橋南絕澗產異草中有謫僊人翛然物外表感懷  
欲從之長嘯秋空曉蒼藤如虬龍跨此勝腰裏下爲白  
鹿洞苔深跡馴擾今之此圖無乃然方袍藜杖真僊佺  
僊芝奇卉紛紛見俯視世界如雲煙人生富貴草頭露

不如跨鹿餐朝霧黃鵠磯邊風雨晴蓬頭曳履隨君去  
淮蔡道中四首  
湖海飄然一破裘荒郊況又適逢秋山黎瑣細全遮樹  
敗葉蕭疎半積溝淺渚小紋閒泛鴨遠村橫笛晚呼牛  
危橋石磴江關雨著箇驢行穩稱不

是處風光是處迷畫鞭矯首過雲西雨餘壠上有牛跡  
店冷盤間設凍齋殘夢好從驢背續新詩多在驛門題  
忽然行到四山靜撲帽香塵花一溪

倣裝初發夢初醒摩眼看山宿霧冥脫兔奔圍飛截道  
病驢涉遠瘦垂鈴當關卻趁炊煙蚤逆旅何堪夜雨聽

只有詩情拋未得征衫墨漬溼郵亭  
荒村薄飯強陳齋菜食蟲餘摘廢畦土瓦炙燈時復暗  
茅茨覆地不曾齊迎神社鼓歡童稚粥面新笏問老妻  
拚醉燈前有歸夢曉風啼殺別村雞

舟發真州

雲暗江郊雪色蘆茅簷出沒遠村孤風沈別浦潮初落  
雨到前山樹欲無南國新霜隨鴈至故園歸夢倩人扶  
葦間一夜蕭蕭響吹起東行十幅蒲

東歸漫賦二首

征帆天半溯江來歷歷山川眼底回勞苦聲隨乾鵲語

團圞話向短檠開品茶經自齋頭註止酒詩從病裏裁  
稱意初歸風境好新霜細菊豔陽催

枕上吟詩日已斜牀頭讀易度年華秋風入夜簷端雨  
病眼窺燈霧裏花

目病初愈

夢裏山川易周歷酒中旗鼓各

槎柯香銷燭跋知何處陡起愁城特地賒

### 初冬村晚

野色寒煙暝未收西風鴈影蓼花洲荒郊地僻人過少  
獨坐支頤聽鶉鳩

### 田園卽事二首

撲樹雙鳩集衝泥一犢行初寒朝雨送晚霽片霞明濁

酒鄰牆過閒吟野步成農夫喜相語打稻趁初晴  
稻積登場滿孤煙傍遠生羣鵝衝雨戲村犬繞籬迎略  
犂斜通水平蕪潤欲耕故人雞黍約款款話柴荆

### 北行自京口渡江二首

離亭飛雪小於錢亂點征衣著處拈篷底臥聽風獵獵  
帆腰斜受雨纖纖殘杯冷向春前暖破被寒從子後添  
無那江關一回首分張應是記青帘

官梅破臘凍含煙極目雲沙接水連隔岸曉迷瓜步雨  
渡江重趁蔣州船山川蒙幸誇金粉風雪將除逼歲年  
獨隱奚囊對燈火中流擊楫舞吟鞭



丁卯元日過下相

東風昨夜到簷楹茅店荒雞報蚤春占歲詩和許丁卯  
攝提人說楚庚寅河堤岸柳還愁我官路江梅欲笑人  
蔓草荒祠畱下相松濤萬馬戰羸秦

下相有項羽祠

二日紅花埠

甫入新年一歲增今朝任運卻騰騰蓬門上馬風兼雪  
店壁題詩字有冰破驛草荒驢齧薦重衾夢破鼠窺燈  
旅中情緒無聊極僮觸屏風喚不應

三日郊城道中

落日古城邊驅車望遠天雲迷渾似夢鳥沒候如煙官

路如繩直柴門壓樹偏亭名傾蓋處舊迹每依然

四日沂水道中

客裏風光怯路難旅中草草具杯餐新筍社甕醅如粥  
薄設菰羹餅似盤古墓燒痕依曠野溪橋煙柳漸舒寒  
離情一夜東風急吹起鄉愁入夢端

五日青駝市

雪汁初融濺馬蹄沙平水急不沾泥斷橋風起聞征鴈  
茅舍人眠聽午雞雲霽忽分山遠近草枯應失路東西  
荒城孤嶂曾遊地作客登臨到眼迷

六日東蒙道中

白道縈迴細似絲雪融泥滑馬行遲荒村徑僻逢樵子  
野店風微漾酒旗細柳垂垂低拂帽春蕪莽莽獨尋碑  
旅中景物堪收拾掃筆閒題馬上詩

將至鰲陽落日銜山寒煙沒野漫成絕句

夕陽衰草沒荒蕪月起前村澹欲無溼雪冷煙誰畫得  
右丞詩寫輞川圖

七日

路入新年接舊年人逢人日憶樽前柳綠節閏先舒眼  
月挾霜寒欲上弦雪樹平分山半壁酒旗凍合路西偏  
夕陽好景渾如昨往事淒涼不忍傳

旅懷

漠漠輕寒雪半消薄沽村酒慰無聊詩懷似草爭先發  
鄉思因風不待招官路泥深尋別徑春河水漲架橫橋  
重陰欲結霜天曉又對寒燈著弊袍

八日晴

門東索飯任兒啼作計謀生策愈低細檢方書占穀日  
定占白雨注膏畦雪消南畝耕千耦雲合東臯潤一犁  
惆悵故園春社近悔緣微祿走東西

過岱

泰岱峰前秋月明當年宴罷宿青城疲驢不記山前路

殿角風吹鈴語聲

雪中山行

寂寂霜寒霧雨冥奇峯幻作素雲屏鶴巢松樹千山白  
鴉落齊州九點青衰柳不遮村外路好風時送殿頭鈴  
羣僊玉戲傳圖本倩我騎驢過驛亭

憶梅三首

年來酒盞向誰開剩有新詩到處裁夢裏不知京輦路  
隔籬猶約共探梅

憶昔茶山放棹時千林香雪點春衣臨風愧負重遊約  
繡佛燈前懺昨非

古驛荒燈塵滿樓一杯濁酒強扶頭重衾不禁新寒蚤  
踏月看花夢裏愁

入都口號二首

久將迂懶任天真妄計衝寒度要津卮酒未添前日量  
征衫猶拂昔年塵嗒焉吾自先忘我壯也臣原不若人  
跨馬香街時極目九衢風物幾番新

魚粥隨僧動午餐流塵撲面峭風寒蘇秦裘敝何曾葺  
貢禹冠新且莫彈自昔春生多雨露誰言日已近長安  
騎驢本是詩人事肯爲迎炎候熟官

曉寐

齊鼓沈沈粥熟時土牀夢穩覺來遲六街騶唱迎霜入  
暖被拖身渠不知

始入岱狂飈震地旅夜不寐成詩

遙嵐破月天宇青雞聲四野號其羣驢鳴自作空谷響  
馬蹄迸踏銅盤傾黃茅店子間古樹粒糶餒雜具陳  
遙相慰勞爭呼飯此意樸厚何慇懃得錢工數計銖鏹  
老嫗勃谿橫聒人軟紅十丈沒馬首積面流垢如泥行  
風伯乘時逞威福澎湃瀕洞無時停白項老鴉啼不止  
摩空翻擊旋作聲白楊蕭蕭列路側黃雲黑日迷荒城  
遊人蒼茫大錯忤失卻半壁春山青犢車征輪少四角

隨風不覺風從生短衣席帽甚顛播珊瑚鞭折如無痕  
急投古驛相拂拭驛門槐仆半出根奚囊詩橐置土銜  
遮眼幸有松肪明陳編細讀頗多味勦聲如雷撼四鄰  
挑燈展轉不成寐山中徹夜松風聽

寺齋市一石鼠爲犬所攫食而歎之用梅村集中

松鼠韻

空堂落清槐小院蔓天棘其下見石鼯跌草似人立託  
質雖無瑕竦身每若惕狀類失林麀脫身何駭疾昨從  
市橋下百錢相售直白或皎雪霜黑又似黔突備種色  
最多性皆善奔逸長茸短苔中四馬追難及乍見多驚

伏漸養亦馴習梵宇疊層階相懸動盈尺身輕絕踰梁  
性猾喜騰擲軼羣逞才技跳躍不餘力我少癖嗜花購  
種類不一款段及秃尾往往時羈繫柔條得紛敷藥苗  
漸苞斥以爾憑社徒託身慣竄匿藏頭掉尾來逋作林  
下客盆池長石蒲短壑垂虬柏日上花光明雨過蒼煙  
溼採芝供暮饑餐英作朝食爾獨睥睨深乘間恣出入  
含葩與殘粉半任爾狼籍非以充汝腸於汝亦奚益行  
飯過藥圃香泥委紅白枝頭見爪痕籬下察行迹譬如  
罍風來亦作羣花厄徒使羈遊人行坐增歎息僦廡苦  
迫地童憊懶藝植貰裘得餘糧汝又齒牙摘曉書索米

碑長鬢度阡陌塵埃積釜甑屏當到臺苙爾亦笑主人  
謀生何拙策不日踏權門行臥乃一室壞琴弄壁間廢  
篋半不葺我亦墨者流小物皆矜惜施食下生臺挈件  
來几席入架傾圖書倒筐啖跖炙齋鐘粥熟時案間拾  
遺粒誰知肘腋間已慮禍患積狺狺聲若豹深夜控險  
塞晝遊豪六衢夜吠撼四壁汝不慮其遠彼方俟其急  
爨樞旣湫隘窗櫺如比櫛勢勇聲愈豪機深計轉密稍  
縱復窮追奮志在一擊肉臊時垂涎身強遭勁敵爰爰  
任短羅趨趨遇犬獲嗚呼世事然機械日煎迫不緇豈  
無方守玄乃要術危機觸卽僵覩此胸填邑淺渚鶴鳴

魚險谷猿偷粟造化各有涯在物奚得失投兔每依人  
鼠思或成泣拖腸驛騷種毛穎中山國旣遭蒙恬畋又  
磔張湯律網羅窄蟲豸搜括到山澤寄謝世間人毋爲  
任怨德

讀史雜述九首

閤門春帖擅鵝羣玉管霜毫寫右軍攜出天街風日護  
五花齊擁墨池雲

別殿乾清是石渠橫經乙夜譯蟲魚承明自有鄒枚輩  
檢點三朝六庫書

瀛池雨過敞雲屏柳拂千官劔珮停賜出羊腔捫乳酒

綵舟齊泛五龍亭

赤帝行威逞化權虛壇夜降紫霄煙階前莫奏唐虞頌  
宵旰常思雲漢篇

仁虞避暑寶宮開黃幄觚稜四角栽水落蝦蟇春雪冷  
月明初上晾鷹臺

名駝寶馬控伊州赤罽花襪職貢修西域主臣齊款塞  
帑金賜出閤門頭

西洋火器擅神京石破天旋百萬營朱雀桁前親閱武  
銜枚夜出羽林兵

撲馬香街潑若雲貂蟬一簇侍中分行宮別詔傳除道

親出飛龍廐裏軍

桑乾流雪響輕雷  
魚服揮鞭校騎來  
羽獵長楊誰獻賦  
直廬新有子雲才

旅舍雜紀八首

玉河春水抱環流  
亂點楊花打雪球  
繡轂香塵愁漠漠  
永安門外踏青遊

青油小幕錦紋鞍  
合縫花鞞髮兩盤  
燕九咬春西便路  
來朝浴佛過梅檀

絲帷鈿轂走輕雲  
窄袖宮衣窄地裊  
寒食燕泥晴上冢  
日斜聞哭故將軍

詐馬筵開捫酒香  
黃羊熊白也親嘗  
箏琶莫唱伊州調  
此曲傳聞最斷腸

僧齋行藥日遲遲  
柏子閒燒篆影移  
濁酒溼煤寒夜雨  
挑燈新譜竹枝詞

短衣席帽傲騎驢  
歸臥虛堂悵索居  
剝啄忽傳雙鯉到  
封題珍重故人書

亮功南星  
頻扎相寄

庫紙澄心字格工  
重封細緘寄郵筒  
建安才子風流甚  
自譜歌詞唱懊儂

亮功抄  
寄近作

輕明珠箔玉階墀  
急拍迴腔細若絲  
曾憶藥欄東畔見  
江南五度落花時

邗江龍舟詞六首

送別江樓半醉醒江風吹雪宿郵亭重來無復西窗夢  
一片江南望裏青

珠簾畫舫碧波紋杏子花衫薄似雲艾鬢巧成蘭葉髻  
榴風颺起藕絲裙

御柳迎風細似絲錦帆銜尾鷺波時傷心斜日雷塘路  
猶把當年水調吹

煬帝行宮舊日樓樓前河水接堤流東風碧盡垂垂柳  
遮莫南巡錦纜舟

日落征帆沒遠坡暖風如醉撲香莎玉簫齊唱江南曲

碎雨零煙葬阿麼

心情老去不堪持長日歸帆譜竹枝紅板橋頭明月夜  
一杯還酹杜分司

維揚午日

五載今朝慣客遊長河漠漠動鄉愁竹溪歌吹無風度  
湖上煙光隔岸收黃黍晨炊停谷口青帘斜颺寫高郵  
前生杜牧今何處獨倚江南舊酒樓

渡江

曉景半明滅春流澹欲傾櫓浮連夜雨帆落半江晴風  
急疎鐘杳波平放棹輕柁樓長嘯去漠漠水煙橫



下岸村看梅憶昔年玄墓舊遊

東風吹柳著衣溫水際人家半掩門煙合平原迷斷浦  
霧移花氣失重村春雛撲雨爭寒樹新犢衝泥過敗垣  
猶憶虎山橋畔路滿城飛雪返香魂

蠟梅用初學集韻二首

飄飄羅帔衆香身穆穆金波夜洗塵一瓊新鵝初鬪色  
六宮塗額最宜春啖花小羽來童子冠玉修容寫太真  
寂寂江梅猶未綻風光先讓菊衣人

巡檐風暖小黃香萼綠花來怪蚤芳竟體幽蘭通密液  
一丸金蓓悶瓊章麝飄栗玉都含磬珀綴銅彝細刻房  
我欲蜂臺尋戒蠟萬花深處是吾鄉

據梧詩集卷三

柏軒草上

己巳五日小集東山雲風堂故址

武進管 榆青村

積雨洗街泥浮雲澹天碧薰風一夜來南湖菱帶滑我  
生苦勞形夜臥夢壓魄對此良辰歡每苦簿領迫有暇  
輒登樓潭水深百尺故人輕帆過開齋得佳客蚤衙放  
吏散彈琴就花席快睹青芙蓉一一捲螺額因偕竹林  
賢同著阮公屐初行喜路幽漸入忽山砦夏木干章清  
溪雲萬重白遠眺極平疇繡錯連阡陌人家半臨水亦

或倚危石松灣漁艇過沙禽鳴格格文字孟張飲湖山  
裴韓宅酒甕中山開茶經南董繹墨池紛荇藻石竈蔓  
蘿薜晚霞弄晴景水氣江村隔佳會繼南皮新詩追謝  
客歸來坐蕉陰展葉大書擘

舟泊羅山偶成

遙天柳岸拂晴煙獨泊江郊思渺然倚櫂吟詩曾昔日  
古庵喬木不知年遠村落日呼牛笛細草春溪放鴨船  
忽漫隔林秧鼓動一犁新雨潤西田

九日馬上口占寄憶故鄉諸君子

排空朔鴈過江濱策馬高原望夕曛落帽偶然成韻事

題糕空負號能軍。蓼灘日落飛紅雪。蕎穰煙多起白雲。  
忽憶東臯奠酒熟。有人樓畔惜離羣。

章門送友二首

寒潮漠漠雨疎疎被酒江樓晚景初別館敲詩離緒遠  
秋帆落處是匡廬

霜落寒江次第痕天空黃葉滿江村西風歸鴈征人遠  
夜送輕帆過白門

庚午正月十二日餘干南沙村看梅歌

南郊尋春春未來雨聲苦滴階生苔東風一夜忽吹斷  
娶婦河伯鮫宮開羅浮僊人攜玉笛吹徹空山千樹白

藐姑綽約御風來精神珠玉肌冰雪雲城大令坐空軒  
簿書雜還窮晨昏忽聞花開意抖搜騎馬遠過南沙村  
村中老叟喜相迓此意朴厚何慙懃聞言比廬一姓住  
年時種花以爲圃此花大者過百年歷數三百十三樹  
清氣旣已先雪霜香風直欲吞朝暮珠樓瓊宇僊人遊  
翠幡錯落玉雕鏤短幹古奇不盈尺高枝天矯飛蒼蚪  
牆西數株最清絕盤根結地色如鐵東皇尊之冠花首  
亦猶古人尚高節我飲梅花酒一作梅花歌朝露綠醕  
朱顏酡天風微來鳴玉珂下乘碧海浮金波花光月色  
相蕩摩山之南山之北擬種千株繞茅屋別買扁舟載

酒行與君醉臥雲溪曲

初春書事六首

新漲沒平溪春鳩屋角啼輕寒隨雨到細草染煙迷葉  
暗花光豔樓高雲意低蚤春幽事好閒坐小窗西  
官事兼詩事深慙祿米賒臨碑供判牘散吏去穿花山  
色遙迎馬松聲雜放衙居然成吏隱閒向筆端誇  
覓酒頻分俸看花欲典衣嫩醅冬底熟殘萼雨中肥晚  
岫依江出疎簾看鳥歸忽驚春事蚤新柳妬羅幃  
漠漠寒風迴春來亦漸和好花幽處密山雨晚來多曳  
杖看雲變憑闌數鴈過偶成懷遠句東望託微波

近築茅堂好還依古柏青霜皮不礙石黛色欲含廳獨  
樹號風切新篁帶雨聽應參莊老趣庫紙榻黃庭  
料峭寒初入蒼茫雨欲來水通南澗遠雲到北山回街  
鼓催新節錫簫颺落梅糟牀近無恙索醉試春醅

元夜看燈歌

燈市自昔推吾吳千奇百幻天下無火雲西沈明月皎  
瀉出萬斛驪龍珠我官於南苦岑寂松肪夜讀招隱書  
三餘之民頗好事排列燈火相歡娛奔雷昨日震林谷  
散走獅象驚貔貙千年老龍淵底出奮鼓鱗鬣揮蒼鬚  
百尋古柏雙蟠踞譬猶萬火燒天衢霜寒萬馬洮河北

陰山積雪追飛狐撥箏琵琶作古調此意最得秦風餘  
瓊花瑤草自窈窕珍禽奇獸多紛如六街么鼓時亦作  
間雜短笛吹笙竽欣然對之命卮酒亦擊瓦缶歌嗚嗚  
吾生隨事可快意况隨土俗祈年租東山月黑風未起  
繞樹列炬驚飛鳥一鐙熒熒坐深夜快展寒江漁火圖

春遊

山色碧如螺黛水光滑似鵝脂細雨江亭問渡落花村  
店敲詩。

正月二十日夜宿章江趙家園舟次夢至一境甚  
佳麗將別索予詩夢中曾作截句云夜半醉歸

星斗散笑騎白鶴過瀛洲醒來續成之  
碧桃花落水交流獨立雙成控玉鈎夜半醉歸星斗散  
笑騎白鶴過瀛洲

邯鄲才人嫁爲廝養卒婦二首

調箏復攏瑟獨博君王恩朝雲回舞袖侍酒畱春溫一  
朝出深宮破屋栖頽垣昭陽夢已罷芳華歇無存匣中  
皎明月寒照蛾眉痕  
蛾眉如春山帶雨晚初溼篋中檢羅襦唾花凝紺碧憶  
昔長門宮夢遠何由入飛螢暗流光寒蛩聲轉急薄倖  
固如斯展轉不成泣

觀劇

豫章二月東風起吹破江樓碧花蕊胸中百萬感噓事  
來聽歌聲相爾汝金堂步障春雲開珠燈百隊花千堆  
一羣腰鼓樽前落紅么翠羽屏中來譜傳南內消魂曲  
金元院本斜行錄緩袖舞殘宮扇影嬌歌訴入蛾眉蹙  
姑蘇臺畔吳宮春中有佳麗能傾城陶朱公何獨解事  
至今史冊推高人東流萬事去如海白雲蒼狗倏然改  
我今亦是當場人莫笑筵前此傀儡

章門返權得一展卷覺清氣拂拂至也

朝衫強著列同班手版頻持媿滿顏身繫常如伏轅馬

眼明欣看出雲山推篷擁日成書屋掛席衝煙過柳灣  
莫訝沙鷗獨相避笑予俗氣未除刪

社日

簫鼓神祠細雨中鳴鳩屋角語東風年來世事真堪歎  
不用醫治兩耳聾

五日泛舟琵琶湖同邵青門先生作六首

簿領初閒蚤放衙樓頭臥看雨絲斜津亭小吏當關報  
昨夜連江水漲沙  
遠山迢遞接孤城梅子黃時雨未晴傳說今年水嬉盛  
卻將秧鼓作鼉鳴

湖堤眠柳拂船低過雨螺峰綰髻齊載酒臥看山色好  
榜舟移向白雲西

一縷殘虹挾雨回平堤十里響輕雷麥黃秧碧西溪路  
荷鍤爭看長令來

春漲新添接岸平隔江好聽踏歌聲歸橈柔櫓中流急  
白鷺驚飛釣艇橫

潭水桃花百尺深與君同泛有清吟隔年此日懷人句  
悵望停雲寄遠心

去年五日與湘翁話別餘署

馬坡塘觀荷六首

觸熱城南跨馬行涼風花氣曉來清胡牀密柳移陰坐

隔水時聞打稻聲

菰白菱青水滿川  
鳧雛鴨母傍沙眠  
溪南綠柳垂垂處  
一派濃陰噪晚蟬

水宮樓閣若浮空  
越女羅裙一色紅  
出繭修眉風下立  
半池花影夕陽中

蕩槳迎風艇似飛  
醉餘香氣襲人衣  
釣船欲動鷺鷥去  
水面明霞送落暉

野風翕翕起微波  
明月新涼何處多  
向晚白蘋洲畔過  
歸橈齊唱采菱歌

清齋畫壁影參差  
獨坐憑欄有所思  
愁對生綃看花色

別花人去已多時

悼憚南田也

感懷

吳音且少歇楚聲且勿聽  
悠然有遐想我思在毘陵城  
東一區宅環水泚且明蘿牽朝雲隨  
楓香暮雨傾秋來足佳趣  
葭蘆沿水生小山多桂叢  
天風發香清傑閣傳春曉  
虛堂名秋聲其下石崖古  
被雨含新晴我一顧而樂洗  
盞邀良朋巨螯網師送玉鱠  
吳娘烹故人以酒餉色滑碧如瑩  
陶然命之酌醉歸臥巖扃  
有時適南畝郊原觀耦耕  
樵人與牧叟往往呼弟兄  
三年宦茲土跼蹐無怡情  
此邦俗陋僂氣每多囂囂人  
除食粟外諸事了



不更自別猿鶴倚夜臥夢魄驚感此意慨慷倏然欲遄  
征藩籬不可破歌罷百感生

八月十八日夜坐

露落章門夜影空省齋獨宿捲秋風晴山入望荒煙裏  
殘月依人薄靄中牆角流螢飛作陣草間鳴蝮語爭雄  
須知此夜思鄉夢定聽潮音過剡東

試院中望雨

南浦微雲隔岸生溶溶頃刻徹天行關山迢遞愁難著  
煙樹蒼茫畫不成細雨草荒徐孺宅寒江水漲灌嬰城  
從來最起懷人思不待秋聲枕上聽

鎖闈和韻上大中丞宋公

乙夜橫經賦石渠牙籤萬軸譯蟲魚詞壇共快風為掃  
官況應知藁可茹國是信疑歸柱史經編得失辨尚書  
由來梁苑多名彥臯助當年自不如

初霽晚眺

雨過雲歸岫樓高樹列屏江流郭外急帆落驛前停湖  
漲全身白山開一髮青秋聲迷極浦蕭瑟望中聽

江右鎖闈即事和大中丞宋公韻四首

畫戟森沈開藝苑凝香鈴閣氣全殊雲青遠嶂秋光淨  
天碧澄湖月影孤雅有文章驚倚馬共看燈火散棲鳥

集賢院古傳流盛夜半天香入座無

冰壺坐對日從容散職承勞盡恪恭袍借秋香人立鵠  
光分藜火技屠龍傳家詞賦推梁苑命世才華仰岱宗  
丙夜繙書成傑句微風入幕響疎鐘

弘開文苑近蘇湖鎖院風高景絕殊雲氣直連江嶼合  
秋光遠入楚山孤高騫士有雲中鵠畫角聲和城上烏  
向晚南樓獨清嘯波光遙接月光無

雲含列嶂斂秋容翼翼才名庾穉恭漢代經儒推鄭伏  
南州詞賦起蛟龍端揆論道傳流派清範持身識景宗  
賓從追陪高興在欣調瓦缶合黃鐘

九月十三日饒州寓齋夜坐

切切哀蛩共寓齋麗譙風順肅平街捲簾始覺露華冷  
滅燭方知月色佳城曲風飄依樹落潮通魚箔帶沙排  
眼前一事堪詩料樞火當秋尚滿階

九日過北蘭寺次漫堂先生韻示澹公六首

山川今古日相仍蕭瑟江關秋氣增客裏關情重九節  
城南獨去訪禪僧

秋堂桂冷露華滋  
几鑪香面曲池一縷茶煙人定後  
芭蕉綠暗雨來時

亭空列岫好攀躋  
簇簇芙蓉檻外齊  
揮手青山踏舟去

半帆黃葉亂雲西

曾憶匡廬放歌日重游殊覺興偏賒今朝官事催人去

五兩風輕棹柁牙

茗盃攜兼碧篠籠參寥泉味古人同明朝縣舍傳新句  
細寫澄心寄遠公

半江秋月印禪心衣露深沾風入林苦被悲蛩寒夜語  
敲燈重把舊詩吟

重過北蘭寺次漫堂先生韻四首

詞客重遊地扁舟過北蘭橋迴迷石磴沙白激波湍廢  
宅徐高士荒樓王子安江山多代謝杯酒酌煙巒

空林傳浴鼓饑雀下生堂竹塢沿溪密瓜畦上架長魚  
來池面皺樹密嶺頭蒼徙倚空亭望西風白恰涼  
爲說高僧傳無慙支遁林池空朝洗鉢壁素夜懸琴定  
後身無法源歸佛見心清談茗盃共野景暮沉沉  
水落蓼洲岸山圍列岫亭停帆風漾碧洗嶂雨含青故  
壘傳殘柝漁燈散暮星江濤同落葉依約望中聽

席上對菊限韻

秋雲亂剪夜光重捲幕燒鐙對晚風釀入深杯成淺碧  
枝懸香蕊綻微紅才華八斗稱曹植步障千層問石崇  
負爾幽期來此地故園荒徑在籬東

章門曉發

西風一夜過荒林清曉章江下艣聲水落寒煙迷遠市  
酒醒殘夢隔歸程山川亂後從灰劫鴻鴈霜前動遠征  
長嘯推篷成獨坐雲帆高掛豫章城

曉行

霜落秋高木葉無馬蹄迸踏草聲枯潭清千百魚行密  
天遠二三鴈影孤獨夜風豪撼古樹未明月落下平湖  
松岡鬱鬱盤鷹隼高翮摩空下澤呼

憶別

憶別家園簿領隨東臯五度落花時珠藤著地香飄雪

高柳當風影漾池春草倚欄成昨夢秋荷經雨動離思  
如今習靜雲城裏望遠樓空獨賦詩

夾山泉曉發

空山無行人夾路見修竹溪寒石磴微炊煙出茅屋晨  
霜滑馬蹄巢鳥飛復宿扣舷語篙師初日照林麓

送友

朔風吹雨細成絲茅溼煙籠白版扉放鴨欄空池積葉  
釣魚磯冷芰爲衣梅巖茶竈應如舊飛鳥斜陽事已非  
獨把一杯當此夕驪駒初唱送將歸

曉望

雨氣橫山夜未除雲留樹影蚤霜初登樓竚目看新鴈  
懷友從頭檢舊書愛讀莊騷因命酒試栽蕉竹已成居  
機心不向宦途用抱甕畦東看荷鋤

安仁陳秀才以其祖士業公箋釋詩傳貽示賦贈  
灰劫西江遺版失靈光猶在有傳經關雎之亂房中樂  
華黍無詩堂下笙漢代醇儒韓太傅扶風高弟鄭康成  
鳳毛遠過相貽示快讀如聽萬壑傾

冬夜坐對山閣與南星中表夜話

遙聽街鼓轉嚴城剪燭山樓話自增往事新愁誰可說  
長年佳會歎何曾江天看月清於水霜夜裁詩硯有冰

愛看碧峰花蕊色年年風雨長蒼藤

雪夜讀宛陵梅聖俞先生詩集

宛陵先生當時大哲匠筆力直可扛千鈞生平遭遇多  
不偶都官累歲安清貧晚年詩體益涵演二百紀後無  
其人同時喜有歐永叔文得正派全天真當年羣以比  
韓孟詩力勁古兼深醇昌黎氣壯筆佶屈東野已稱北  
面臣先生後起非耳食力振昆體歸先民今觀澄心堂  
紙作自命已與爲等倫世降文體大孱弱正派失傳多  
沈湮黃口童子吹寸管鳴球戛擊虞廷賓終年未讀先  
生集猶列壇幟鬪齒唇也素心竊嚮往學填韻語真

效顰都官全集一再讀寒窗丹墨忘手皴有宋詩學邁  
往代非僅初盛中晚爲奇珍蒼蠅吟聲駱駝坐蝴蝶飄  
屋雞司晨

和東坡山谷先生種菜

北菜肥甘如切玉江南食笋連山竹干越地苦兩俱無  
惟食鹽梅雜齋粥官衙隙地作畦圃種蔬之外兼杭稔  
菰名折項莧子赤黃芽種異間蒼菘霜刀削菹訝同色  
芼以薑橙翻手熟煮豆泣釜燃枯萁菌子驚雷色如珠  
長腰粒白軟火炊絕勝飽啖花猪肉長鬚蒼奴遶籬行  
慣執鷄嘴手皴瘃吾徒一飯已快意百錢屬饜猶爲辱

晴窗曝背一欣然行廚香飽盃中粟

帳鈎

銀押雙鈎爛若空瓊姝環珮立墻東蒜條垂葉方抽玉  
筍節行鞭已脫叢羅帳飛螢明似月流蘇挽鳳曲如弓  
有時還作幽窗話細語春宵怨晚風

冬夜對南田畫感懷

北風晚怒號明月何皎皎積雪如凝脂寒光翻宿鳥嚴  
城漏三下萬籟寂然杳燒鐙對畫壁愁腸九迴遶木葉  
盡黃落長江遠茫淼故人歸雲溪漫漫隔昏曉百年幻  
影拋松楸漸以老自從摩詰亡當世少文藻壁間雷煙

雲川嵐氣繚繞迴思東臯夜陳迹已如掃孤兒甫六齡  
齧齒傷幼小長當繼君志犀角自矯矯杯酒酌泉下思  
結傷懷抱千年丁令威化鶴集華表

和漫堂先生咏物韻

簷冰

江城雲壓雪無聲瓦鏤魚鱗玉管生風動珮環都不語  
雨含蘆茁漸將萌流鳥入幕消無跡凍雀蹲簷墮欲驚  
聞道擁書揮句好閣頭鈴共曉霜清

鱸魚

沙岸秋風罷釣回年年清夢繞湖隈  
檣頭船小波飄葉

巨口魚肥柳貫顛羹滑蓴絲同珍重緜披黃雀共低徊  
章江不似松江好望斷煙嵐亦慨哉

破硯

誰剗徑壁體難全悵望銅臺漳水邊洗墨魚吞疑月缺  
揮毫蛟舞快珠圓芭蕉葉白全舒未鸚鵡臚青恰自然  
失志才名多類此摩娑應受解人憐

蕉葉白硯中佳者  
放翁詩硯涵鸚鵡

太真調笙圖

花陰籍亂坐調笙宮柳鶯和最有情譜入劒南西狩恨  
雨淋鈴曲斷腸聲

竹屏

屏素又兼華琅玕翠壘遮渭濱千畝植淇水一痕加湘  
女曉凝淚甄妃暮帶霞玲瓏圍九曲步障不須誇

孔雀

在昔名家禽於詩比秦客常誇品類奇紀實載誌冊颺  
風來炎州指車款南譯貴因從雕籠遠多乘市舶舞竝  
豈蔻圖名列珍鳥籍月扇隋宮圓飛旂漢殿借綠蕤長  
垂冠碧光炯閃覩引頸首漫翹竦翅肩難拍旣以艷羽  
毛亦復見骨格團如垂車輪翠似點妝額行或如鵠停  
聲應笑鼠嚇喜卽作舞旋怒因畏逼責啄食惟稻梁搜

尋到豸螫絢采疑霞蒸毳毳快霧拆空欲振風翎閒思  
奮健翮嶺南佳麗地洲島非逼迫榕樹鳴鷓鴣古埃呼  
格磔杜鵑聲多哀翡翠色偏赫山雞吐紅霞海鷗嗔避  
席石燕雙飛輕文雀五色奕雲白堪辟蛇鷄鷄常引戟  
秦吉異產佳鸚鵡隴頭隔朝入庾嶺空暮歸瘴海夕似  
此金翠禽豈非鳥中伯翻棲宜高枝照水矜麗澤啄食  
香粒餘防牛飲泉擇臨軒喜張舞緣徑苦隘窄衣維雜  
赭黃色或間蒼赤屏曉常開雲林暮深藏碧傷風時作  
聲當階勢如擲羽織黼黻章圖畫王孫宅聞與花蕊榮  
常於元圃適故巢渺雲海寄身笑肥瘠獻尾滇池來拾



翠瘴煙獲雷行感生氣青霄喜託迹遠作紅樓望應受  
丹梯役拈筆對屏風摘句愧攬撫

辛未元夜訪北蘭澹公用宛陵和景彝閏臘省宿  
韻

雲淨空巒轉玉繩禪扉夜叩墮簷冰春江漁火看無數  
明月青山到幾層遠岸兒童喧小市隔街荒廟鬪綉燈  
章江客舍逢元夕踏凍城南訪老僧

元夕放舟二首

新城小市結燈棚我獨攜琴放櫂輕官鼓迴颿如撒豆  
誰家促柱獨調箏三更細雨未成夢半月春陰今乍晴

斗大邑城山署冷五年不作踏燈行  
八尺蒲帆月夜開長空征鴈獨飛迴廿年此地曾看月  
依舊青山入酒杯

十六夜大雨舟行康郎道中

雪消春漲水波生擁被篷窗聽雨聲夜半敲詩多不定  
艣枝催夢過江城

舟中值雨

竹篷戰雨無時歇檣櫓鏖風徹夜聲白浪掀天驚月窟  
黃鴉攫食繞空城滄江一葉舞澎湃船屋千卷披縱橫  
杜翁陸叟有遺憾後世空祇傳詩名

月夜修琴閣看梅

春光如錦氣何溫  
霧白煙青竟不分  
昨夜東風斷簷雨  
今朝山閣看晴雲  
花因月上常難辨  
香為枝高未易聞  
寄語南沙千樹好  
驂騮重繫日初曛

據梧詩集卷四

柏軒草下

二月十日南沙看梅短歌三章

武進管 榆青村

朝乘花信風  
步入梅花谷  
沿溪苔上牆  
夾路松間竹  
墟煙四五家  
午炊出茅屋  
林端水如練  
帆檣上下逐  
千峯瘦嶙峋  
百株氣芬馥  
嗒然自怡情  
物外領幽獨  
近村四五樹  
拂水多撩人  
隨花到南谷  
香霧朝朝新  
吞吐含雲霞  
溟濛隔昏晨  
煙火不敢食  
恐瀆此幽真  
何人堪比之  
其惟洛水神

看花不倦賞薄暮徒徒倚酒雖飲醇醪清矯莫能擬日  
暮風南來笛聲猶媿媿聲從何方多聲自何方止半落  
江村花半入江頭水

二月奉使致祀康山忠臣廟入湖三十里波恬

風靜甫至岸狂風大作檣櫓不寧詩以紀事

鄱湖縣衍三百里涵虛萬象勢無似水天一色欲辨難  
但有元氣相推抵往日乘帆拔舵行排空黑浪沒江豕  
篙師相誠勿戲言匡廬秀色莫敢指今年二月戊午日  
日當上戊越上已維彼康山大忠烈歲命有司肅將祀  
楡也備員屬下風敢勿恪虔充是使黎明戒僕急就道

輕帆掉向煙波裏雪消新漲春水船如登天上駕飛駛  
鳧翳拍拍水光淨羣峰修螺披綠綺鞞紋浪小碧激濫  
卵色天空雲披靡須臾畫角停春帆回顧碧海光瀾瀾  
繼而風猛撼古樹疑有靈物相訶詆乃知頃刻變化間  
益信神力方如此憶昔明祖平陳時時維建國方八紀  
鯨鯢負勢最崛強妖芒黑眚彭湖恃長江木梯蔽空來  
樓船十萬江頭艤舳艦銜尾開黃屋旗蓋踵蓋飛赤鯉  
怒濤翻日日光薄瞳朦觸山山勢起鮫人河伯爭效命  
齊執橐鞬隨鞭弭中有勇將獨英傑晨曦殺賊至日晷  
或如紀信不顧身或如萬春中六矢或奮呼敵突重圍

或執短刃剗野兕或因牛車用火攻或如龍戰相角觝  
斯時日月爲之昏雄劔羣鳴血花紫遂使前途已倒戈  
三百箕裘定於是汀洲寂寂悲青燐霜月娟娟照殘鎧  
曾師夜半拾古鏃估客艤舟看廢壘嗚呼丈夫生死貴  
合義馬革裹尸真足喜假使平陳無此人百萬從龍盡  
堪恥我今拜公淚嗚咽千年白骨空江委我今拜公肅  
敬恭百世遺芳垂柱史公靈當在康湖間鼃鼃夜去蛟  
龍徙公靈直與天地存山河不改華嶽峙靈旗翩翩雲  
滿湖陰風颯颯陳酒醴烏羊白豕歲嘗薦何處招魂一  
剪紙

### 風箏

江南二月柳花飛天外箏琶調最奇有志凌雲惟故紙  
無聲落地少牽絲驚來社燕銜泥去錯認遊蜂繞樹窺  
點綴星辰伴明月一燈常在半空移

### 地鑼

編竹無煩吹作聲兒童博戲鬪新正慣能旋轉隨人意  
纔假吹噓便欲鳴風轉庭除看狡捷眼看輪動最分明  
紅絲牽惹常無定何事當場怨不平

### 鞦韆子

輕簾折燕倏東西妙技傳來高下齊誰向錦籠尋芥羽

多從繡篋檢朱提便踰猿捷常依井勢比鸞翔似踏梯  
輕旋最誇身手健短衣縛袴一相攜

荷燈

越女新妝巧剪裁花光背月徹明開簾垂不使微風動  
玉豔常疑映日來采處錦塘應不夜摘時紅淚欲成堆  
誰家巧作春燈樣畱與詩人照酒杯

睡香

紙閣湘簾碧水空一株穠豔卻當中花明玉結飛瓊雪  
枝挽霜毬破小紅袖裏有香常引夢釵頭無力好依風  
曉來露重啼痕溼二月江城正雨濛

落花詩二十首效石田六如先生作

踏徧街頭又陌頭一番憐惜一番愁參差蜂蝶隨風舞  
容易繁華逐水流隋苑綺羅空委棄秦宮脂粉忽沈浮  
多情杜牧吟詩處倚徧揚州舊酒樓

乍暖天光幾日晴施朱傅粉總關情鶯簧雨嫩穿梭急  
蝶粉香濃化夢驚何處啼痕堪寄與是中恩怨未分明  
詩人悵望渾無奈只辦芒鞋取次行

玉樓春暮萬花中樹底嫣殘樹杪空薄倖忽逢三日雨  
無情又是一番風金鈴自作憐香語繡幕深加惜玉功  
羈客髮應千丈白花前不敢對青銅

脩袖輕袿羅鞵塵凌波微步渡川津誰將刺繡傳圖本  
急倩丹青為寫真緩緩歸將初曲度堂堂去又一年春  
神移情駭誰堪說小草斜行賦感甄  
斜陽默默悵春期晚晚簾垂委地枝紅粉倉忙樓上墜  
蛾眉宛轉驛前悲月華陳苑迷張孔花草吳宮怨種蠶  
悟徹維摩空色界吹簫禪榻鬢成絲

惆悵迴廊亞字牆千株空鎖一園香巧隨乳雀銜枝出  
幽罨遊絲颺日長院落微風訴憂怨空階夜雨說淒涼  
傷春怕讀江淹賦惜玉憐花死未忘

唐子畏詩惜花心性死方休為下一

轉語

強扶殘枕夢回溫啼雨愁雲又一番千樹紅霞春爛熳  
五更香霧曉氤氳敲燈院落還拈笛背繡房櫳獨掩門  
多少好花當此夕東風吹落怨黃昏

寶馬香塵油壁車惜春春色過誰家三更殘墨畱新句  
一夜東風嫁好花空使開時催羯鼓徒令賞日雜箏琶  
吳趨自號多情子不惜三條檠燭斜

斜橋垂柳轉鶯梭三月之三晉永和蝶戀餘香蜂背膩  
魚吞殘影鴨頭波倚風漢后膚凝粟捧額唐宮看暈螺  
莫訝倏開旋又落好花開向雨中多

惱被東風吹欲殘雙飛蝴蝶忽成團疑他化億香魂返

猶作當初玉面看拾向紫羅應是血搗來靈藥好成丸  
江南無限新愁曲嗚咽傷春總一般

百五光陰一日空分飛飄蕩各西東美人妝竟初衣白  
才子詩成和比紅柳絮吹殘江岸雨鴛鴦颺起酒旗風  
無情無緒傷春候自譜新詞唱懊儂

誰言薄命是傾城猛雨兼風昨夜驚燕子銜來如有恨  
蛛絲牽住煞多情苔陰一尺當階埽樺燭三更繞樹行  
時節正逢寒食近深街處處賣花聲

曉看翠歷晝廉纖樹底人過側帽檐爲雨消殘紅淚溼  
被風吹落綠波黏香煎翠膩初勻面睡印醒霞怕捲簾

詩瘦酒狂春臥病一牕紅雪亂書籤

春去春來信有因看花常欲過東鄰酒逢積雨成佳客  
月上新枝是故人衣漬淚痕勞記憶夢回香影辨疑真  
杜鵑夜夜空啼血不管愁多鬢似銀

年光九十易驂驛時入春來百不堪十里淒波風蕩漾  
雙棲歸燕語呢喃花鬢委地蜂鬢護汗粉沾泥蝶粉含  
高臥山城朝寂寂徐鋪小簟夢江南

小榼芳樽郭外遊花前珍重繫驂驪可憐紅雨飄千點  
俱作黃丘土一杯笳拍初聲辭漢苦琵琶千載起邊愁  
儘供憑弔煩詩句卽不傷春也白頭

一日春光抵萬金賞花應在半陰晴桃腮杏靨嫣然笑  
冶葉倡條亦有情多少燕泥花作塚萬千蜂室蜜為城  
東風開落何恩怨鶯語叮嚀說不明  
牆外春池綠滿堤牆頭花落倏東西人因春去迎眸送  
鳥為枝空盡意啼頓失紅樓漫錦障祇留綠樹叫黃鸝  
東皇肯結長生蒂不惜黃金和作泥

誰言春晝永如年愛惜春光夜未眠坐對嗔兒休上樹  
臨牕戒婢莫輕攀無須時日傷零落沒得心情奏管絃  
只恐雲濃明又雨強扶殘醉駕遊軒

春色江南到闔閭銀箏玉笛唱吳趨香雲合處迷橫浦

夜雨山前長綠蕪樹自昔年曾憶種杖畱來歲約同扶  
寄聲莫使春閒去寧典鸛裘過酒壚

雙柏行

餘干衙齋兩古柏竝駕層霄列雙戟高者擎雲營鸛巢  
低者拳曲瘦蛟脊傳言閱歷三百年臃腫形軀鬚蝟磔  
對舞蒼蚪幾十圍爭卓虎牙二千尺霜枝吼雨兼吼風  
鮮色侵皮不侵骨一株獨立干雲霄團團飛蓋雲中遙  
有時秋空洗河漢上拂蒼穹挽斗杓有時風磐雨急橫  
疑有怪物蛟龍捎一株斜倚天空裏翠光逼樹入牕紙  
微風東來相蕩漾瓦鑪煙生焚柏子我官於餘苦荒寂



榛莽委地積廢甃何年僵立兩蒼龍婆娑貯雨青銅色  
土人曾傳寅卯年天狼夜動飛狼煙山城藏匿狸鼠跡  
堠烽賊火相接連居民畏兵勝畏賊草木亦苦難生全  
時清我來吏牘判陳列琴書布几案西偏隙圍作高齋  
愛看積翠橫天半爰以雙柏顏其軒童童車蓋張羅幔  
霏霏雲影漏月痕蒼蒼曉霧連朝暎曾經兵火別利器  
得同金石蟠霜根盤踞平原膺地勢孤高直榦排風雲  
洞腹豈甘螻蟻穴香葉終要鸞鳳騫無令大材所處隘  
惟傳故老時下拜

遣興二首

一夜東風細細生雨絲著物潤無聲空庭屐響春晝靜  
時有鶉鳩深樹鳴

臥對屏山晝閣扉春寒乍起欲添衣無聊細雨沾泥溼  
粘住楊花不得飛

題憚南田長幅山水

南田先生老經儒胸中百萬江山圖偶然振筆一揮寫  
氣象已與人間殊清溪百尺水渺渺沙回雲滿征帆孤  
近村小橋接溪路春堤草色靡平蕪忽然巨靈神斧劈  
瀉出萬派跳江珠高嵐夜嘯碧峰墮煙樹雨密聲疎疎  
凝眸熟視獨良久疑有神鬼與之俱因知此中大變化

戲幻筆墨於須臾一草一石有真意純是神肖非形模  
當其展紙時意象何徐徐筆所未到氣已到蠻君鬼伯  
如驅奴及其山勢稍窮處畫雖已盡神有餘譬如鮮卑  
策快馬能得抑縱供馳驅須知先生實詩老落筆真可  
繼王盧間作書法乃大妙折釵屋漏言非誣行年五十  
不得志長視富貴如有無能事散出作筆墨聊寫大塊  
為區區吾吳昔推石田子品格彷彿宗倪迂今觀此畫  
實神駿高堂素壁煙生裾奔濤百丈石崖古如有水勢  
常相呼晴窗臥對意殊快攬身欲入神先祖何時辦卻  
幾輛屐為登絕頂攀高梧中山忽作鸞鳳響喚起蘇門

長嘯徒

睡起

午夢懵懵睡起遲茶煙一縷靜中移不知春色今多少  
捲幔花飛滿曲池

桃花四首

東風吹雨細成絲落盡江梅別故枝正爾巡檐惆悵甚  
小桃忽漫露芳姿

紅牆十丈送斜暝檢點春光已二分綺閣晝長無箇事  
開簾日日看紅雲

花色光華酒色融花光堪與酒光同多疑花醉朝沾酒

盡吸花光酒盞中

積雨空階長綠莎池塘添得鴨頭波東風吹破千枝好  
一夜臙脂委地多

懸燈桃花下作短歌

紫絲步障三十里微風初來錦霞起雜以銅盤樺燭明  
燈光直逼花光裏當窗數樹倚牆東雨霽盡舒濃澹紅  
蔥蘢晚霧暮光薄一瓣欲落流溪中我來持杯照花色  
十二紅樓凝月白夜深燈炮花茫茫酒醒明日飛紅雪

棠棣

南沙村中看梅蕊香風朝散雪千樹月臨軒頭小桃破

明霞萬點紅如火朱朱白白滿江城官閒便作看花行  
三千佳麗爭刺眼眼明不及花光明朝來簷漏跳珠落  
春泥一尺春陰薄籬間草色逼侵樹樹底柔枝破金萼  
三枝四枝飛空庭疑看碧海懸疎星千朶萬朶臨窗倚  
如塞黃霧因風起飛雀啄破蜂含窠新妝鬧掃感子蛾  
枝頭柳色翻春波蠟丸乍破風應和衣痕翩翩碧勝菊  
樽中乳滑黃如鵝明日風滿花如何不然笑酌金叵羅  
二月廿八日春遊紀所見

湖上人家曉煙裏籬門對望隔湖水春宵微寒細雨生  
萬樹桃花雜空翠浴堤數株低拂船陰陰碧柳參天倚

東風爲我洗寒霧螺峰一一皆秀美何來楸船柔櫓聲  
未識搖櫓者誰子半船已沒緗桃紅一篙初亂春波中  
鞞紋浪痕猶未起水曲疑與桃源通湖堤草色綠如織  
古鏡繡起磨天空居人種田過南陌村婦曬網倚危石  
閒鷗眠沙靜不驚惟見十里春雲碧我來愛玩不忍歸  
小桃初落因風吹柳絲欲結不可住隨風拂拂來我衣  
我來看山復尋寺果然不解了公事王文成詩中丞不  
解了公事到處看  
山復酒旗茗盃常隨游醉歌閒咏當來此賞心籬外幾  
株妍朝朝新雨含輕煙樓頭風止花還落山下鳥啼人  
欲眠

寒食漫興

江城雨歇冥煙收水漲南湖入縣樓詩派源流邀客語  
粵游紀什報僧酬鷗先鷺下池塘晚燕與花飛院落幽  
簾捲東風苦飄蕩山齋春臥正添愁

放鴈三十韻

既瀦記彭蠡隨陽居鳥宜金風浩呼洵噉噉鳴且飛朝  
從山之崖暮宿湖之渚一舉志千里豈惜安栖卑維年  
冬大雪雪花千山披凍口霜草啄溼翅冰渚移呼羣悲  
鳴切鍛羽飛動遲兩鴈起沙際翻飛脫罾機一鴈託迹  
杳拍拍河中坻一鴈獨逼迫已遭網罟垂持來市中賣

奔走喧童兒人鳥同相憐百錢酬以貲置向軒窗東飲  
啄務以時蓼花委頽岸藻影漾清池啄食計梁稻啜呷  
牽荇絲肅肅梳羽翮稍稍登階墀雲衢意豈忘中夜鳴  
多悲摩空秋隼旋首矯目還馳笑彼燕處堂譏同雞棲  
埒一朝振風翮颺去天一涯騰騫失故居漸陸振羽儀  
知非籠中物困迫將何爲鴈鴈吾告汝江湖浩瀾瀾高  
介汝情性皎潔汝羽衣雲霄有行侶詎終安沮洳慈恩  
埕未集雲亭字問奇衡陽既有峰永嘉亦有池上林若  
來賓啾啾賡和隨清曉叫閭闔一洗淫哇靡回首主人  
恩怛焉感去依

作放鴈詩後并放雙鳧

雙鳧放向暮雲間帶雨衝風去不還豈學鳥飛王子晉  
吹笙騎鶴過緱山

過雨二首

過雨出西郭夕陽千樹明渚鷗梳翮健沙鳥浴煙輕詩  
罷遣兒讀茶烹邀客評遠帆依日落乘漲到江城  
雨歇翠依竹水浮青貼荷小紅扶欲重新綠溼增多亂  
水歸爭壑吳牛晚渡河登臨重懷古題句託微波

漫興

匝匝花陰入縣樓湖光嶺色倚欄收訟庭吏去獨眠鹿

柏徑枝垂偶語鳩料理墨池搜石竈追隨蒼老厭時流  
天教勝地供吟咏日對雙峰作臥遊

絕句

詩向無言靜裏求雨窗蕭颯聽如秋不知新漲添多少  
獨上清江百尺樓

新霽書感

遠嶺碧成黛江花紅欲然鳥呼泥滑滑荷長玉田田好  
景宦游過新詩夢覺傳深慙劉五字斫陣一軍堅

漁家四時六言四首

背郭堤圍茅舍沿溪水漲明沙桃花深色淺色柳線風

斜雨斜人語驚鷗衝浪船空載鶴歸家前村晚燈初上  
又踏磯頭釣車

赤日流金當午蕭蕭水浸葭蘆采菱采蓮歌起白蘋白  
藕風徐浩浩長空嘯遠茫茫大地愁予雅志不須在釣  
牽船補屋爲居

水落清江一尺潮生別浦三更柳岸梢頭曬網蘆花船  
底炊秔蟹食稻肥落斲鳧呼雛出眠晴持魚換酒一醉  
夢覺風聲水聲

木落雲寒山峭灘鳴水狹堤高霜花半積柔櫓冰漸凍  
合短篙雨笠製如桐帽煙蓑暖當春袍前山日落風起

明朝雪捲鵝毛

萍

楊白滿空下綠陰  
雷渚汀魚穿青瑣  
碎雨動翠零星船  
過開仍合風來散  
復停憐渠花葉底  
蛙吹靜中聽

新霽小飲得窗字

宿雨催寒燈影幢  
溪流千尺下春江  
鶯雛展語時百五  
鳩婦喚羣棲一雙  
水漲野塘通北澗  
雲迷殘月上西窗  
持杯對此真快絕  
愁壘百重如受降

送友二首

三月二旬過初無  
一日晴只今風日美  
又聽踏歌聲溼

柳行多翠遠山雲  
欲生蕭蕭江岸葦  
帆向此中行  
急漲連城角開齋  
卽踏船帆檣依雉  
堞鳧鴨亂陂田惜  
別春三月思鄉鬢  
五年一樽相勸罷  
悵望各江天

繡毬花

十日春陰雨未殘  
綃衣浴罷玉珊珊  
半天綠雪千枝結  
一朵香雲四面看  
茶入越甌誇共色  
蝶飛晴霧欲成團  
醉來莫認楊花舞  
同是霜毬仔細看

次韻答山陰蔣同野卜居羅山

羅山草木盡蒼然  
天與先生山水緣  
蔣詡浮家來闢徑  
張融補屋又牽船  
裴韓門第從當日  
吳楚江山記昔年

新築茅堂依絕嶂看君把筆賦秋煙

春晚書懷

晚立南樓夜氣涼歸鳥挾子過荒塘風搖細草添新色  
雨剩殘花發故香巢燕還尋舊時壘遊蜂爭趁樹間房  
灌園抱甕漢陰客忘卻機心對夕陽

遊石虹山

夜觀石山志朝遊石山里石山兩相望奇峰何秀詭西  
江山水窟廬嶽等岷嶓巔石風嫋嫋螺子峰峨峨間得  
好事者考古爲搜羅脫或委榛莽勝迹常消磨自我來  
餘汗湖山供嘯歌惟恐偶一失他年恨如何石虹山名

已耳熟石虹山勢何嵯嵯中有石室獨與邃傍列古篆  
形蚪蚪千餘年來盡剝落斧痕爪跡纏薜蘿八十三字  
是何語恐爲神鬼所詆訶雷電夜掣蛟龍懾異書豈畱  
同凡科谿訝怪石獨撐距如虎如象如牛駝或云巨靈  
昔斧劈鏤成空洞深盤渦登巔下視碧湖色湖水激灑  
翻銀鵝其傍一山亦秀美東風吹雨飛煙蘿仰眺俯瞰  
皆歷歷林谷答嘯聲殊和意爲呼猿洞或疑衡門邁使  
營菟裘吾老焉二頃先種油油禾苔封蘚蝕拔地立虎  
牙雄卓青穹摩寒山片石已堪語此豈不足供摩抄

玫瑰二首



小苑尋花事已殘，僊人紫府曉乘鸞。人當晚立倚風過，  
香自朝濃帶露看。色借相袍紛綺織，味調梅鼎備鹽酸。  
簪來婢作夫人格，花史無端莫詆譌。花史以玫瑰為花婢  
東風徐漾曉霞天，一種濃香最可憐。昨夜樓頭聽春雨，  
今朝簾底數金錢。名誇紫府從來貴，點上紅妝分外妍。  
閨閣秀供簪髻伴，好枝難折膽瓶邊。

送春

傷春送老欲成歌，杜宇聲聲喚奈何。花本三千風蕩漾，  
韶光一半雨消磨。他鄉酒貴尋徒少，獨夜香添得句多。  
休說春歸惆悵甚，春來佳日只閒過。

偶成

初罷衙聲看翠微，虛堂晝影亂雲依。荷擎玉蓋翻珠露，  
柳脫新絲謝故衣。二句夢中得綠暗江村知夏淺，紅殘庭院  
送春歸。宦游風景筆摭拾，閒臥湖山對夕暉。

初夏書事六首

過雨洗青嶂，夕陽移暮潭。秧針齊刺碧，船尾遠拖藍。麥  
秀壠飛雉，桑柔家飼蠶。春風隨步屨，最憶是江南。  
譚理嘗清茗，消愁有凍醪。栽花因竹雨，敲枕聽松濤。酒  
以傷春減，詩從感事豪。素琴時一撫，流水碧山高。  
小雨妨花密，疎風隔樹陰。綠看蕉展葉，黃綻柳含金。枕

石看雲到拈詩待月深是中成小住何必問升沈  
別圃栽紅藥空庭落小梅竹低千點雨柏老一身苔雲  
冒初成霧山深欲隱雷郭門春水漲定有白鷗來  
鶴篆侵階古蝸涎上壁寒飛花催結子護筍待成竿堤  
樹成陰密秧田積水寬籃輿郊外過日落晚山看  
雉媒嬌引類鹿子點成文晝暝山腰霧斜風水面紋茶  
聲如過雨松勢欲擎雲自有靜中趣喧聲寂不聞

過朱湖

江村綠暗長靡蕪細雨扁舟入夜孤水鳥一雙莎際語  
櫓聲遙荅過朱湖

繡婦歎

紗窗日影澹於煙正刺鴛鴦傍水眠錯把黛螺描樣本  
羞將顏色妬鮮妍愁腸百結針難解珠淚千堆線與穿  
同倚繡牀誰箇識是中情事苦無傳

夜來詞二首

浣花牋好白凝脂才子吟春索賦詩儂檢篋存三百紙  
與郎為作定情詞  
初月侵牀小帳開紅鴛翻浪恰天裁不須持燭看花色  
知是前身號夜來

亦住何必問沈

千點雨柏老一身

上屏寒飛花催結子護寫待成竿堤

為非空翻隨

紫山對我白錢韻木子令春索規指數餘齊三百餘

交來隨二首點成文書眼山腰露斜風水面紋茶

同尚齋林館箇燈吳中勸事苦無軒

蓋泮顏色破鞦毼百餘檢獲翰耗幾千封縣與空

窗日湯鬱沈對玉陳鷺鷥窗水翔龍叶黨點點本

聲齋散漢朱湖

據梧詩集卷五

武進管 榆青村

修琴閣集上

簾二首

湘篁春後淚痕多好染冰紈映碧莎疎處難留巫峽夢  
垂時欲剪楚江波風來蕩漾花疑舞燕去息忙尾半拖  
最是水沈煙細處斜陽未捲意如何

檻外清江吹碧紋水光閒與日光分三千宮裏六時淚  
十二峰頭一片雲寂寂夜闌防月照霏霏花豔隔牕聞  
就中春色知多少燕子飛來又夕曛

夏雨

江干六月日初曛小築臨流夜色分  
簷北樹深雲潑墨  
牕南雨過水吹紋驚濤虛閣搖松子  
碎影層闌引竹君  
河朔報書招酒伴閒居何必悵離羣

白槿花次漫堂先生韻

姑射初凝素面妝乍開還斂怯微陽  
月明有夢歸珠館

雪滿無痕倚玉牆何處持花宜竝笑

江總木槿賦  
若持花竝笑

但須

看影莫聞香芙蓉向曉紅霞亂憐爾  
冰姿獨擅場

立秋日送友

蒲帆初掛洗衣塵江上諸峰列髻新  
詩思快如蕉緒吐

鄉心渾似柳眠頻風行浦澈涼先入  
雨過琴書潤可親  
寄語高蟬聲莫切桐陰漸減正愁人

辛未七夕

我昔好神僊大言誌迂怪齊諧博物志  
搜覽考經解事  
跡既渺茫何處尋根蒂往往畱疑端  
附會作佳話黃姑  
織女事此言如繪畫流傳到人間色香  
下真界古人寄  
高興作詩類爬疥有乘枯槎浮有誇腹書  
曬要皆等誕  
妄今古聊一噫或云以年期無乃遠為  
屈聞傳烏鵲使  
亦類青鳥价吾思桃源記一歲等一  
邂天上紀為時吾  
生海之芥妄測僊鬼事一記十漏絳  
虛堂秋風來庭砌

極瀟灑美酒行官廚湘蘭發西廡借此節物佳聊展筆  
墨快夜涼風徐徐百草滋沆瀣吾徒文字飲戒不作禮  
拜巡觴嚴酒律出句脫詩械雙柏晚涼青新月當檐掛  
七夕效唐人作  
靈鑱沈沈起露臺長生前殿徹明開微聞甲帳求僊意  
又見昭陽竝輦迴烏鵲自填銀漢穩綵霓應訝曉風催  
三千空有如花面誰信天邊乞巧來

青錢硯毛匏村索賦

我昔嗜古如痂癖品題玩視極珍惜大者搜及鐘鼎彝  
小亦不遺一片石長天江岸涼風吹故人輕帆來何遲

開齋揖坐絮語畢示我一卷青錢詩青錢繫名古時硯  
黑如元圭碧如鈿埋藏想像晉魏間形體數歷蛟龍戰  
意爲玉工常剖削更謂僊家百鎔鍊秋簷抹眇一展視  
光芒似掣巖下電或疑錢質圓且堅雙蚨安得相連卷  
毋乃全是碧銅色土花血紫三千年不然異石最神化  
常出怪誕非偶然青錢恐亦石所變故有烜采相貼連  
中庭啾啾喧衆客我有定論君莫識昔聞異物每藏隱  
偶列市賈最可惜此硯入地千歲月一團斑斕古花色  
不知出自何代塚年久質合如膠漆金石皆爲土所孕  
是有至理非耳食或云宋時王荊公蓄硯有此毋亦同

又云吾吳文徵明一生囊篋相偕行我今見此大快意  
二公文采皆足記古來一物必有神今觀神物得所寄  
君不見咸陽璽角亦缺折茂陵金盃風蕭瑟又不見銅  
雀臺荒魏寢煙漳河春水遠連天誰將土碧千年物來  
種陶家白玉田硯乎硯乎真足貴爾其寶之弗輕試萬  
選何如學士名墨池況有蛟龍氣

又題青錢硯二首

誰將片石點蒼煙吟盡江南詩百篇恐是小牕攤硯日  
東風吹落綠榆錢

春苔雨過石如錢醉墨題詩不記年持此好歸東海畔

筆潮常湧萬重煙

坡詩我持此石  
歸袖中有東海

送匏村東歸

江城雨歇送新涼客子驚心話別長樺燭清樽風細細  
桐枝珠露夜茫茫城遺羽竈苔全沒路入龍津草半荒  
知爾此中移櫂去布帆穩過弋溪陽

毛匏村示予管夫人畫山水宋榻黃庭經及青錢

硯官窰印池摩挲竟日皆奇珍也作四珍歌

丈夫四十未卿相富貴神僊總虛妄譬如至寶不世出  
間歷塵埃爭得喪一朝快遇方瞳人靈氣躍躍俱飛宕  
吾吳才士推匏村笑傲不詣王侯門胸中丘壑千萬卷

法書直逼王右軍一肩琴劍極瀟灑怪底囊橐何所存  
衙齋涼影淨如洗示我一幅澄心紙秋空水落明溪沙  
野人攜杖隔江倚題句妙絕管夫人下筆真能比學士  
更有一榻黃庭經王孫承旨爲鐫銘全以神勝兼骨勝  
籠鵝意氣來雙睛博觀二妙已快意觀止不敢傳譁聲  
君謂客輩莫驚愕研田寶守吾所託青錢小研色斑古  
筆花文陣常隨落匣有哀玉聲琤琤製度古雅而深醇  
丹砂紅映帝青碧卵色天曉雲衣新我思古來萬事安  
得偶瞥爾文房逢四友不觀珍物出篋笥詭奇歷落蛟  
龍走爲君覓筍輿臥披秋山圖興酣狂墨潑古研右軍  
大令供馳驅旁綴丹印得古意盃中碧色青璠璣從來  
異物得所主每發光焰言非誣行知天祿石渠物常隨  
虎觀晨昏趨不然持此何爲乎

讀唐久庵先生家傳

側聞古君子行事法賢聖居恆凜潛修出處合義正操  
身旣端嚴遇事必恭慎餘廼發爲言外亦用於政今觀  
久菴公斯言深足信著書務窮源立品戒躁進鄉黨推  
爲師橫逆因之順維斯大德化此孚彼則應古人嘗有  
言行誼先由近鄉里多譏訾立朝來悔吝家庭有間言  
未免畱餘釁先生幼學時孝友其天性篋中無遺財檢

點到盤飴及長居里閭浮華亦俱屏鶉衣兼脫粟窮年  
務考訂婁江秉鐸教伯樂識神駿非止研文辭吾道爲  
一振當時東吳士羣以比安定意謂先生賢慈祥著恪  
慎以惠先士風或難傲貪佞及誅敗檢士亮節何清勁  
金沙海氛餘人心方懼震先生辨多力羣疑賴以靜不  
然收書下玉石亦俱燼仁者又勇兼此言爲可證解組  
歸田間奚囊已如罄鄴架千萬編幾同禪榻鬢式間來  
公卿嘉言重貽贈吳楚兩越間記集已充牣雙眸何炯  
炯月旦如晶鏡古惟文中子後起亦爲僅先生古世家  
毘陵爲望姓禮樂傳代久詩書遺澤峻秉性惟清嚴立

身先誠敬惜不用於時在廷聞讜諍趨庭有家學後嗣  
復輝映迄今讀斯篇遺風猶未竟梧捲意何深屬予發  
吟咏綸也愧後學出句苦不硬但聞前賢風嚮往竊誌  
慶聊抒蛩螿鳴用展景仰請捧編懸里門百爾其敬聽

絡緯

長年夢繞故山中草屋三間落葉空愛製芟裳招楚客  
每披篳笠唱吳儂征人旅館驚清露少婦寒砧怨曉風  
憐爾草根吟未穩又看參影度牆東

新蟬

高齋鎮日靜焚香弱柳當空半拂牆聲怯風多常斷續



翅憐鬢薄看微茫神方不死能僂蛻幽恨無端爲怨王  
多少世情誰與訴樹頭清晝莫悵悵

蟋蟀

壞壁牽蘿綠覆門孤燈風動泣黃昏牀頭絮語消秋夜  
砌下標名有御盆宣廟戲金蟋蟀盆金葛草荒來宰相玉堦露  
重號將軍何因不耐霜天冷月下牕西說怨恩

螳螂

巧就濃陰密葉藏健因蠻觸便開張荳花棚底絲絲雨  
桐子梢頭細細涼世事歎同蟬可捕妄塵但解臂能當  
有人清夢華胥國慚愧莪冠衣綠郎

文鹿

空階樹色映晴軒雨長蒼苔見迹痕飲澗晝常呼子出  
懸牌朝入亂巖翻雲深石磴羣銜草雪滿山齋夜撞門  
勞爾追隨酬故紙伴予病酒臥秋根

雙猿

巴西侯國石爲居踏蹬飛崖百不如長嘯遠空三峽夢  
懸鈴共守一牀書挂枝愁引江鄉客食芋欣來隱士廬  
豈是腸緣四聲斷折花採藥最憐渠

白山鼠

桂館秋空清露溥養馴堦下玉爲團雪中似與花爭出

月裏還隨影共看亭號草元君尚白城封管子隱非官  
何緣走臥山齋畔遮莫瓊宮亦苦寒

雙雉

巧置良媒素網空麥黃斜日隴頭風低飛挾子不盈尺  
傍母呼雄時欲同登木好調聲入譜將雌應化石爲童  
憐渠文采無施處拋向平田碧野中

秋葵

風動輕綃澹不飛羽冠塗額玉真妃鵝兒戲雨染成酒  
鶯羽當枝吹上衣蜜室夜深垂珀盞紫房朝起閤黃扉  
道人招飲瓊漿罷金葉歌殘舞影移

鴈來紅

綴就丹黃舞玉臺珊瑚彩筆五雲才新沾卯酒霞初暈  
望斷西風鴈欲來秋老素娥君獨豔花殘青女爾猶開  
誰從濯錦江邊過葉葉紈羅巧剪裁

坐月

夜臥秋齋看月生影移高樹漸西行花含露潤香先發  
竹爲風來葉有聲砌下蛩螿語恩怨檐前河漢勢縱橫  
幽人不寐攬衣起吟句忽驚山鳥鳴

竝頭千葉蓮花歌

吾聞靈山之北楞伽之東蓮花千葉開空濛摩尼慧珠

散花雨幻出百億光明峰維摩一室天花墜其中尤者  
金芙蓉又聞華山之巔玉井蓮碧筒注月何田田花開  
十丈不可見傳說藕大多如船說僊說佛總茫昧古人  
寄懷有深意我來白雲里頗喜栽名花玉缸藕梢生荷  
葉如輪遮初含一莖斂朝豔若耶溪頭淨秋練少焉日  
出霞龍從輕妝薄幌雙雙炫趙家姊妹來昭陽西風徐  
起吹雲裳湘妃出水聽鼓瑟對面一一開明妝誰將紅  
羅織成錦碎剪細刻懸空房千重萬疊淨如拭常發異  
采飛光芒因知奇花間亦有恨不再得龍眠手圖成懸  
掛千百年足證僊佛亦非偶三餘地苦少秫田酒貴如

玉沽無錢對花不敢食煙火坐臥日日成詩篇夜涼風  
清碧雲斂恐有僊子來踟躕持花玉殿作供奉猶記曾  
陪玄圃筵

### 四面蓮花

百尺玲瓏千藕絲一絲畱得一花枝千絲綰作同心結  
一朵花開四面垂

### 秋涼飲酒詩六首

商飈洗炎氛秋堂發濛霧細雨叢溼衣嶺雲斂晨暮山  
空落木葉泥深沒雙蹠登樓鮮快意長空目遠注歎彼  
機局新對此煙霞故千里愁能來百年錯已鑄笑問誰

解人意惟酒堪晤

三餘俗陋僂酒政無能行三杯沃枯腸歡叟相摩爭冬  
酒點越水味薄甜如餳醴酒市所貴粥面如濁涇嘗酒  
稍黃碧要非聖者清我雖不善飲辨味識莛楹三秋苦  
病渴瘳藥惟飲醇故人攜樽酒色滑碧如瑩開緘已流  
涎急命洗破觥莫書酒德頌空腸轉雷鳴

我性不善飲飲止一蓮葉偶遇得解人亦浮一大白花  
前明月下勸酬相主客讀書到夜闌得酒如拱璧最是  
萬感生書空破几席忽然秋風清高樓擲箏笛此時不  
得飲何以瀉愁積昨從章江來千錢買一石牀頭春甕

香不飲亦可惜懵懂入醉鄉今古皆陳迹

舊交已零落酒徒亦云少東郭有壺公字行以香草夜  
雨剪畦韭盈觴列清醪豪氣吞江湖快飲隔昏曉十年  
走楚越歲月日催老同時有南田滴酒不欲擾偶沾唇  
吻間興酣筆墨飽作為萬里圖江勢最天矯兩人量迴  
殊酒態亦俱好憚生昨春前長逝復堪悼聞之廢杯酌  
日夕傷懷抱會持黃柑酷澆爾墳頭草

吾讀兩漢史最傷黨錮事李膺與范滂潔身遭謫毀廢  
置以終身復為子孫累小人既鴟張聚黨十常侍炎紀  
因以衰衰曹開僭侈古人亦有言人亡邦國瘁感此意

慨慷長歌擊虎子所賴麴生力用以澆醜礪

嗟嗟世情薄嗜利如嗜酒嗜利不顧名嗜酒充適口利  
外復何物聲名置美醜酒外亦奚求得喪復何有古惟  
曠達子功業寄杯缶若彼貌似者毋乃等芻狗寄謝世  
間人阿堵不可守

後飲酒五首

吾聞陶淵明晚節何遠寄怡然見天真此外無足累其  
前惟劉伶飲酒寓深意聲名寄浮沈大塊以為戲二公  
皆曠達陶也得精粹以醉遺世乎不復見天地以醉忘  
形乎何所不棄置寂寞後世人不能見其志古人醉固

醒今人醒亦醉

我性苦迂拙落落寡所親前年雲溪叟寄書為我陳作  
官持大節蹤跡寄風塵稽生最耿介龍性真難馴想在  
晉魏時坎壈終其身況此世趨下變幻隨喜嗔何為守  
初志軼軻長苦辛聞言起三歎旨哉如飲醇

行恭以貌謙言恭以貌謹蜜口心鋒銛如蜮射沙影若  
彼久假人陰賊天所秉醉中見天性往往發其隱千古  
聞斯言清夜動深省

人生天地間勢利能驅人秉性澹漠子鼓歌堪終身家  
庭日詬誶絮語難具陳恥為黔婁賤傷同原憲貧談笑

說人主扼背傾公卿朝猶客上舍暮已拜平津回思曩  
日事變態如浮塵前倨後恭謹此言何足驚人情類如  
此飲罷百感生子言恐不信君請觀蘇秦

我今理酒政檢點到酒具景窳哀玉鳴琤琤斂秋素干  
花樽底香一縷碧波注霞天木葉丹返照紺色吐一吸  
覺神清恍與瑤臺遇再飲氣滌蕩如渴得甘露三杯意  
慨慷浩歌凌虛賦杯盡月澹灩味滑碧如乳長嘯答秋  
光無爲此官誤

偶吟

明月長空問酒家濃枯醉墨兩行斜誰持玉管臨風舞

吟徧江南樹樹花

風雨三日爽氣新涼快然成咏

霧氣橫山水氣浮垂簾風不度香篝橫牕新竹疑雲合  
倚檻戎葵帶雨收砧急溪南時薄暮荷荒墅北又初秋  
涼颼颼快人意雲缺東峰月上樓

出郭

南湖八月水辭磯極目長天鴈思稀野岸人家煙細細  
空江城郭草依依罟師晚集因魚美沙渚秋明見鷺飛  
何用尊鱸方起念西風每到舊山衣

餘干懷古詩五首

陸鴻漸茶竈

古來曠達子寄興超鴻濛西江古佳麗湖山畱高風前  
有靖節叟後有桑苧翁兩人所嗜別高致如冥鴻毀茶  
與止酒清論毋乃同辰春游柴桑五柳尋遺蹤卯秋入  
餘汗晨夕來東峰石磴半苔積古竈多塵封螺峰遠綽  
約日影移高桐顧渚與日鑄味質每苦濃越水最清冽  
飲之寄心胸山空落木葉石徑鳴哀蛩古人不可作清  
嘯問長松

考亭雲風堂墨池

吾觀司馬遷氣宕文雄馳聞其過龍門慷慨長嗟咨後

作為文章縱橫復離奇性情如寄耳山川為發之考亭  
朱夫子篤友敦人彞千里訪故交握手慰別離舊交轉  
零落涕泣悲連沍浮雲蔽太空良木傷其萎古惟汨羅  
子遭遇還如斯臨池攻訂釋深夜歌之悲況此湖山間  
浩渺多憂思登高偶一望松風吹我衣至今池畔石墨  
漬如淚垂徙倚望良久檢笥讀楚辭三歎不終卷況當  
秋空時

趙忠定梅巖

名山讀異書此樂不可假趙公天性真憂懷在宗社讀  
書勵晚節秉志益醇雅御書誌其居翰墨極揮灑想其

揚州詩集 卷五 三  
結廬靜香林雪盈瓦至今避席鷗翻飛復上下嶺雲朝  
欲畱松濤急如瀉惟聞廢寺鐘寂寞晨昏打

劉長卿

幽意忽不樂驅車上東城迴望白雲飛一一向我生清  
露既以溥螻蛄夕哀鳴緬懷劉文房登眺詩初成高懷  
寄曠達身世鴻毛輕啼鳥解悲怨衰草秋縱橫古惟佳  
勝地逐客常縈情江州白司馬送客琵琶行至今潯江  
上夜夜來潮聲

琵琶洲裴韓故里

沿堤草盈川面郭水成沚清秋燕子飛溪痕低拂尾銜

泥不能宿還尋舊時壘舊壘裴韓家第宅連雲被滄桑  
幾變更壞牆沒廢址空餘城上月夜夜照湖水水上秋  
氣清水外秋聲起琵琶寂不語千古暗垂淚竹間風露  
寒蕭蕭亦入耳

感懷三首

長江自岷山素練倒飛瀑一入沔鄂間澄波失其俶下  
至潯皖流泥淤更萬斛此豈地勢然亦猶運會蹙註經  
有酈生探源到窮谷三笑問山靈何爲頓殊目潛沱已  
異勢遑問及支族山靈亦有詞萬事如轉轂三湘氣可  
吞九派勢如輻天隨一釣翁浮家任洄洑在山泉水清



出山泉水濁少陵不云乎斯言堪三復  
憶昔遊里衍結客忘晨暮東鄰良宴會上客虹霞吐西  
鄰載酒從高談逼遷固自從西行來歲月錯中過出郭  
寄心神人少但見樹團團巢飛雲蒼蒼點昏霧坐臥當  
秋空此卽尋幽處托根伏蛟虬樛枝間新故南天靈秀  
鍾意惟爾堪語

商飈洗素空木葉已盡落下至蠅蚊儔遠趨若避鏑頗  
快天宇清亦得親杯酌須臾風漸斂此輩復自若殷雷  
徧牀隅昏飛入簾幕氣會只暫爾若輩質原薄一朝晨  
霜寒爾亦安所託篝燈到夜闌用荅讀書諾

南樓二首

南樓獨坐看雲移日腳穿巖下廢祠荒浦荷衰鳴雨急  
空庭葉落語霜悲山迎朝爽涼先入樹斂秋容瘦更宜  
十日濃陰風乍緊鴈來惟有客心知  
短堞依雲上與齊天空倒影入明溪磯牽釣艇鷺時立  
煙出茅簷雞亂啼江岸征帆風下上荒郊歸燕翅高低  
長卿懷古猶能讀醉裏狂吟欲和題

臂痛

常年病渴過秋天判牘如流獨未使用臂不靈難使指  
曲肱爲枕且高眠誰誇運腕能驅鬼未必通關卻遜猿

愛看官奴苦持筆明朝何處索碑錢

牽牛花

傍屋牽花花亂垂將花補屋影參差眉間螺黛描難就  
水際天容澹不移細雨蓬門人定後曉風籬落月殘時  
青蛾白紵居空谷露重更闌冷未知

張燈瓶桂下成歌

南州八月秋多風故衣盡落蓮房紅天空明月洗寒霧  
散出樹影千重重白雲城西多哀蛩砌下細雨吹高桐  
露寒忽綴蕊珠暖雪滿吹落香風濃道傍灌花有花叟  
臨風細摘來筠籠百青銅錢持以贈香風過處爭遊蜂

膽瓶古色流翠碧高下枝發荆山叢低亞背面都姣好  
疎密位置天然工琉璃屏色墜紅暈水精燈影含素空  
陶然命酒色味濃花開花落流霞中吸花神與瑤臺通  
酒沾不覺花光融醉眠花霧如空濛花迎月色歸簾櫳  
夢游應上姮娥宮玉杵凍合雲爲封清寒恐亦非所耐  
失足夜墮芙蓉峰醒來對花默無語十日可作平原供

飲桂下

三秋愛選名花勝五載驚心客思淹半角長松陰羃歷  
一牕黃雪晝廉纖巒煙似向牆頭出蛩語多於葉底潛  
淨捲玻璃懸屋角細飄金粟滿亭檐閒吟憶舊時攀樹

午睡攤書不捲簾屏逼素空含碧水衣從天染著秋縑  
高低蕊綴懸珠閣濃澹香分啟玉奩露自曉來寒未入  
雨當陰積冷徐添草荒籬畔棲馴鴿雲漏山腰下彩蟾  
似霧瀾漫和月落如飴氣味被風黏搗殘玉杵花爲藥  
醉把霞觴酒漉髯珠露細傾光灩灩銀河遙隔夜厭厭  
開時轉恐殘時悵醒境何如夢境恬燭跋夜闌全見月  
葉濃風緩半侵檐江城對景鄉思遠虛閣裁詩濁酒兼  
顧我宦情雲樣薄憐渠香味蜜般甜高巖錯落堆金縷  
倭几橫斜滿玉籤詩格快參霜穎脫眉痕初澹暮山尖  
圖畱小景遺徵仲架有新編讀子瞻珠箔重垂香自久

好花貪看性殊廉長吟宋玉悲秋賦不執吳剛斫樹鎌  
最憶東臯迷水榭幾招隱士到峰崦漁莊黃擘團臍蟹  
罍客鮮分巨口鮎庾信小園花作障香山半格口成占  
敲斜醉墨泉源湧潦倒情懷筆陣鈇如此良宵真不惡  
謂予僊吏我何謙追歡憶舊餘清夢貫酒拋裘拂布帘  
寄語商風莫飄蕩畱花相對散花拈

折桂枝插瓶作歌

江城八月已寒露每看月明思桂樹東風城角飄香來  
隨風尋去千枝開短牆圮沒臨官路荒藤牽屋屋半仆  
回思當日春風妍懸珠作舍黃金鞞門前車馬久寂寞

晴時花開雨時落譬如才人不遇知僮奴目爲宇下兒  
又如邯鄲貴人女一朝嫁爲養卒婦其時卻有郭橐駝  
尋花遠至深巖阿凌晨折枝以相贈云助秋夜詩篇多  
銅樽玉盞盡古式高低背向安妥帖雲屏曲曲霞幕遮  
素魄溶溶秋月白夜深剪燭光徐添銜杯細酌幽情恬  
此際已無風作暈此時惟有月穿簾吾聞月中之桂高  
千尺下有玉兔常臥籍天香夜半來人間光搖彩筆吟  
詞客迨後攀折何多人此花夜夜生煙塵吳剛憤此急  
斧斫寂寞古樹長空青一杯酹花爲花語放飲狂歌其  
我許去年零落野田中誰爲持酒澆黃土今朝移汝來

高軒銅溝水冽蟠秋根他時花落端溪硯更寫長歌返  
斷魂

中秋放歌

今夕何夕鵲南飛涼風瑟瑟吹我衣樹頭忽下秋水鏡  
屋角倒捲寒玻璃此景此時最難得銀河瀉水當檐積  
酒卮返影流寒光天廚細切飄香屑猶憶去年東湖濱  
湖光夜映高堂明庾樓賓從叨陪侍清嘯遠答江潮聲

千秋鎖闌侍  
中丞宋公

今年明月偏更好官居清夜如瓊島庭中

十二燈屏開堦前玉女珊珊來檀槽鴈柱一聲促持酒  
月色流金杯酒酣歎事亦何極昨夜雨聲今夜月半月

秋陰一日晴晴光況又逢今夕今夕秋光已二分故人  
天末寄朝雲還從詞客遷遊地暫作悲秋感舊人

中秋月夜游東山歌

并序

雙柏軒讌集頗極詩酒花月之樂同人興猶未  
已偕過羊角花蕊兩峰下瞰琵琶洲歷歷如繪  
南湖環帶左右清風徐來水光樹影若隱若見  
求所為越水者於萬頃一色中庶或遇之少焉  
客作長嘯聲山間驚鷗皆起松風颯然不知身  
在塵世也歸來夜眠不寐披衣啟戶月華如瀉  
漏已四下索筆成歌

白雲城南月正午溪邊肅肅鳴寒杵堂虛靜夜酒細傾  
風吹桐葉落如雨銀河皎皎當晴簷中天直欲飛瓊蟾  
吾曹逸興猶未已策馬又過秋山巖巖空路仄逼山寺  
樟陰在天月在地攀蘿直上花蕊峰山風彷彿吹香氣  
下視湖水空茫茫水天接色流素光意疑銀河此堪渡  
或者澗壑雲深藏中有匹練橫風起昔云越水母乃是  
恨不呼來桑苧翁煎茶石上聞清鐘南峰北峰最縹緲  
康湖珠湖勢迴繞此間恐是蓬島中等視萬象迹如掃  
時復漱齒含清泉深潭積月月光小吾思江湖迢遞千  
萬山此時此景誰能攀譬猶寶鏡匣中出照見嗔喜妍

抄本言集 卷五 共  
媿顏今年今夕此情景別有天地非人間君不見洞庭  
之月千百里買酒雲邊問漁子又不見蜀中有山名峨  
嶓峯高萬丈天四垂舍此當無是景矣明年明日還來  
此

婁山埠

婁山埠黑斑虎黃蘆短竹沒水許人家白晝盡關戶漁  
師昨夜西港歸吼羣呼子類有五東鄰樵叟晨出門不  
見老翁見薪斧西鄰長男暮歸漁晴光覩覩隔江浦五  
更柴扉聞叩門老嫗啓門抱兒乳白骨未冷風多腥舐  
血血寒遺左股鳴釜執耒驚四鄰虎亦疾人人亦怒猛

虎欲搏先避人人怒齊呼心愈苦持爾弓張爾弩一發  
已中肚居人逐虎到山塢虎立戴頭作人語虎雖猛受  
人侮血漬草肉登脯父悲母哭奠酒漿日色無光面如  
土毛斑斑色楚楚當時閃爍明雙睛今日俘縛等一鼠  
君不見婁山埠黑斑虎

據梧詩集卷六

武進管 榆青村

修琴閣集下

惲南田匡廬圖憶舊遊作歌

世無雲林石田叟眼中塵霧積成斗世無谷簾瀑布奇  
胸中丘壑誰能披憶自辰年春客游住湓城湓城九派  
勢迴繞上有五老雙劍青臥遊咫尺不可接常時風雨  
連滄溟又憶丙年正初夏南康刺史周燦開賓舍芒屨  
時從石頂探筍筍每許僧房借棲賢水色碧於天梵杉  
松徑濤如瀉歸來作詩傲惲生惲生見說多關情晴牕

潑墨發雲嶂秀色濯濯鵝溪明斯人筆墨已如幻對坐  
面目還疑真自從惲生乘鶴去此圖夜夜空煙霧漢陽  
峰下三疊泉有人拂絹吹雲煙黃猿飲子藤嫋嫋野鶴  
浴澗風翩翩筆間萬里等一幅身後寸墨雷千年我今  
南行到干越匡廬遠望時明滅高堂朝懸王宰圖玉潭  
倒瀉雲峯立凝眸曾憶來游時此中幽怪無人知何方  
攬身入畫裏徧踏壘嶂層巒敲山靈相望不相接惟向  
秋山夜夢常見之

樊老翁

樊老翁五十有子行相從朝持斧斤入深谷丁丁斲木

鳴山空晝肩新擔歸暮宿茅簷中老嫗浙米雜芥菘稚  
子爨葉炊枯蓬一飽矮簷下身世如冥鴻槿籬草扉半  
不闔黃蘆苦竹常成叢凌晨出門去岡頭霍霍來妖風  
藤蘿附木勢延蔓怪石插天形怒兇誰何虎視戴頭立  
嚼齧掉尾來相衝兒牽父衣掩面哭父急先子當其鋒  
可憐此子十三歲血沾野草糝糊紅老翁傷子心惻惻  
奮力持斧銳一擊崩崖塌谷聲嚎呼搏虎惟憑此寸鐵  
礮礮旋作霹靂聲僵藤枯木已盡折虎雖搏人未下咽  
那知猛氣已忽絕老翁不誇得虎雄放虎枕尸淚沾臆  
鄉人驚訝爭傳言我爲記事書之篇自來壯夫本慈士



歌罷對酒還相憐如今通都盛哮虎晝遊六衢食人股  
安得持翁斫薪斧掀髯一怒荅臺府

文華殿大學士戶部尚書蒼巖梁公挽詞

用白香山代書

寄微之

百韻

大雅傷淪落斯文失主司驚聞遺表上書到遠方知情  
迫天為隔神通地不羈既無銜玉報敢厭製詞卑憶昔  
外王父金蘭切友規拜言情汲汲直諒意惇惇春閣曾  
同列秋毫憶共持雲墀朝勒馬月殿夜牽帷雅興過潭  
柘閒吟到漢陂形忘骸骨異交訂死生期世值柔柔會  
人歌黍黍詩朔南心尚阻道義日相師聖世推名彥吾

儕重有為花磚閒草詔別墅坐圍棋賦出驚三省詩成  
頌九達賜衣勤政殿陪宴曲江池丰度都無似詞華最  
擅奇宮袍同草色甲第覆金絲視草花為地承明玉是  
枝吐詞胸礪落退食度逶迤豈止文工麗還看政設施  
立勲曹與鄴分陝召兼姬政令先文治樞機戒武嬉晝  
聞天近漏曉接彩重看錦幄墩先賜離宮席蚤移冰壺  
寰海澈模範古人遺志切東山屐賢來北海卮出都塵  
外望歸馬日邊遲金屈閒中釣筇枝醉後騎含桃春晚  
熟盧橘子低垂瑞柳眠三起嘉禾穗兩岐占同非虎卜  
命彼後車隨御史行驄避尚書賜履催兩衙權總握六

府事咸資時際中天聖功垂百代宜人當擊壤日帝  
正典夔時十二黃鍾秘三千禮制窺求文朝矻矻考古  
日孜孜貢舉藥充選連茹穎脫錐張羅搜鳥網設罟釣  
魚坻鄭伏多經解歐蘇發異詞賢良經濟策秩禮太平  
基削地誰持論炎方久困疲喜傳恭已詔 敕賜建牙  
旗漢殿推元老王章定等衰節持青犢蓋 詔令白麻  
披輶使桑田駐鳴騶柳下縻簡書勞節鉞歲月凜驅馳  
謨尚存樞府章時達殿墀赤旄風照耀彩鷁晝參差南  
土瞻祥氣西州凜雪姿旗黃金錯落緋紫繡葳蕤正氣  
消兵革稜威嫉喔咻扶藜觀漢使率舞拜蠻兒國體知

無外臣心在不私滇池驚虎豹閩嶠竄狐狸鯉海誠能  
格行臺信豈欺嶺梅飄阜幔官柳映犀毘韓伯今應是  
蘇公意或茲法言多正直侃論係安危返棹風恬穩回  
輪路險巖象犀頻職貢蕙苾豈能疑去日春花發回時  
秋草萎西南欣有障嶺海藉相支赦過收新效求才略  
小疵心能成鐵石功獨固藩籬 丹闕敷陳喜彤墀朝  
拜辭廟謨先奠蜀讜論次平夷海宇咸清廓山陬皆禱  
祠敘功鐫柳篆定策勒韓碑惠政推山塢汪波到水濱  
百僚欽斗極萬國望城隍岱不遺培塿江何獨渺瀰金  
甌占赤鳳玉笋進花鸚鼎鼐調梅豉陽和下枳籬冰川

生異草寒谷有晨炊山靜麟遊市河清魚鼓鬢聘莘崇  
相任夢說慰予思漠野張天伐長城奏鼓吹能肩天下  
重忘及一身羸輪列忝卑齒君言實飲醕清堂趨禮法  
東閣習威儀鈍質雖同櫟愚衷竊比葵才蕪慚衣錦宦  
薄混塵緇拘似櫪間馬爻占洛下龜涸鮒河可潤桂蠹  
藥能醫三輔高如彼經年困若斯淒涼當歲晚音訃到  
天涯淚絕沾襟帶憂深見履綦墜驚薇極宿香稿石山  
芝辰卯猶趨侍音容竟別離海天多缺陷明月有盈虧  
命也真難問天乎不可追宗風無執主文代孰興衰絲  
繡容如在書封寄與誰夜霜先落葉秋雨暗摧梨空寫

肝中語強支病後頤風聲連燭暗蛩語助秋悲欲起還  
如醉雖餐不療饑寥寥天地內悵望擬何之

題南田畫竹

南田畫竹全用意筆所未到有生氣琅玕直立千萬條  
新筍初生四五地晝牕人靜聲琤琮晴檐上拂青霄宮  
誰家銀甲促絃柱何處玉珮鳴秋風壁間素練秋如洗  
青鸞欲動風聲起插籬好爲護龍孫籜聲夜落雲溪裏

雨霽遠眺

高臥江城又一秋酒杯詩笈日隨遊黃花籬下開還落  
白鴈燈前去未休自入南來無好友聊憑北望有危樓

當牕靜對雙峰翠明日扶筇擬過雷

九日花蕊峰題句

北蘭去歲過重九繫舫江臯快共登浪裏奔雷疑湧雪  
雨中聞磬有歸僧今年風景如初否此日詩篇得未曾  
策杖偶來花蕊畔寒潭秋潦晚來增

九日謝蔡立先廣文惠菊二首

客子驚心重九時連宵風雨度秋期他鄉節候占花候

東坡云菊花開時卽重陽

故國愁思起夢思城角無樓看北鴈山齋

有客咏江籬三年未把茱萸飲醉帽今須插一枝

攜來秋豔十分妍紫悅黃裳最可憐佳節適逢連雨夕

好花偏占欲霜天去來何意慚陶令詩酒相從有鄭虔  
舊日柴桑君故里東籬還結古人緣

冬夜寄懷錢亮工中表

江臯朔風起天末落葉街南積盈尺此時客子正臥寒  
村頭沽酒相邀歡持杯欲飲不遽飲剪燭西牕有餘影  
憶昔五年來南州望遠日日登危樓雙峰翠角最清絕  
遠岫綰髻湖光流江山亂後還姣好碑碣仆地青苔浮  
因思長卿不可作祇有懷古城南頭白雲朝來暮還宿  
此間幽隱真滄洲清音堂高下臨渚水聲颯颯鳴寒杵  
齋頭千尺琅玕鳴樹杪十丈蛟虬舞羈客與酣每快意

詩成落筆走風雨夜半江城聞鴈聲寄書今夜由南浦

曉寢二首

高臥江城萬籟空秋山歸夢與誰同雞登埭唱歌街鼓  
鴉出巢鳴候寺鐘庭樹葉凋牕蚤白紙櫺風透日初紅  
年年辛苦南征鴈又挾寒霜度曉風

屋瓦魚鱗半積霜五更歸枕夜蒼蒼無窮世態只堪歎  
有限年光須底忙木葉初丹鴉匝樹幽人未起雀窺堂  
香傳簾幕移花盞欲謝餘寒近太陽

雨

小雨催寒蚤新霜入夜微靜疑黃葉落閒與短檠依茅

溼炊煙緩苔深屐響稀江城當此夕明火點漁磯

落葉

落葉千林瘦空庭暮集鴉橋南迷石徑埭北阻漁家酒  
惜三更醒詩從五字誇江鄉物候蚤霜樹勝於花

津渡二首

危樓東望日初低煙起江村暮欲迷苔蝕篆文何處辨  
詩稱懷古昔人題亂鴉攫食羣爭樹白鷺窺魚時下溪  
露冕郊行來往熟閒隨飛鳥弋陽西

背郭沙堤夕照明西風落葉晚寒生新津渡口歸鴉集  
秋草原前病馬行才似劉黃猶主簿地當吳楚有孤城

旅人慷慨饒吟思況值霜天鴈影橫

次韻荅董遠公惠墨

江城官柳日三眠好友貽詩敘昔年彭蠡秋深多宿鴈

石梁春去訪遺僊

來書云春遊天台

雲山踏徧阮公屐書畫攜

來米老船珍重險糜勞遠致寒牕試寫寄君前

雪二首

縣樓高擁正當關半郭汀沙魚鳥閒黯澹雲來蘆宿鴈  
微茫風起樹開山遠峰兩兩眉先白古柏垂垂髮蚤斑  
蕭緘官衙獨高臥如澠之酒破衰顏

煙際柴門晝已關同雲郭李畫圖閒亂鴉遠過爭棲樹

危閣頻登獨看山竹徑壓枝當石臥樹根飄屑點苔斑  
青山繞郭頭皆白欲倒瓊巵破旅顏

小寒日卽事限韻三首

空軒下明月苔徑積霜枝書句頻呵硯開懷強把巵雪  
消梅欲放寒入鳥先知寂寂衙齋裏無人問所之  
瘦影披蒼柏新詞譜竹枝霜華鏤玉瓦松葉凍瓊巵破  
臘梅應蚤消愁酒是知新編長慶集白傅與微之  
鴈思來千里風巢借一枝自憐天畔客亦把臘前巵凍  
蕊暗香動嚴霜曉被知停杯問明月寒夜爾何之

夜坐

匝地濃陰漏月痕幽人夜起坐空軒鴉爭古樹號平野  
鴈帶清霜過華門別派論詩右雙井按年譜事序羌村  
關情三百寒梅樹問訊東風欲返魂

鵲巢行

白雲城頭飛凍鵲望樹長鳴繞三匝去年作巢城東隅  
日出喳喳爭哺雛今年作巢舍東樹樹頭百尺撼風雨  
舊巢已去新巢成巢高十丈畱青陰取枝不取墜地物  
知時晨噪長飛鳴霜寒落葉淨如掃月出山空接昏曉  
登高祇覺天宇低入戶頓忘身世小東望占鳴日正高  
羣看梁木定新巢避風枝畔應名館織女河邊好作橋

千山樹杪飛寒雪衝風日日勤補葺爾巢鳩居理固然  
應知世不任巧拙當簷獨立爲予言一枝相藉皆君恩  
明年榆錢落滿地爾巢卻在濃陰裏有人要識長官衙  
鵲飛起處知子齋

壬申春日寓居書懷用楊省菴江寧村居韻十首  
江汀煙雨晚瀟瀟曉起看雲半未消桃暈露濃初入靨  
柳眠風急不勝腰牆東綠覆依鄰屋城北苔生入市橋  
極目靡蕪春草路芳洲何處採蘭苕

病枕支離不裹巾閉門又了一番春常從舊事論成敗  
懶向今人看笑顰燕市臺空傳買駿魯公書絕說圖麟

斯文將喪當誰與吾道由來慎處貧

雨暗前山易夕昏悠然尚寐欲無聞易求甚解牀頭玩

琴未逢知爨下焚西郭日斜紅映樹東溪水漲綠生芹

故人天外貽雙鯉珍重封題寄白雲

羊角峰連花蕊峰南湖春水送歸鴻梨花寒食傷心雨

柳絮清明到面風草色淺同衣上縵酒杯深漾樹間紅

遺蹤久欲尋桑苧茶竈全蕪石徑東

不知愁臥過春光但見閒花覆野塘寒渚水生雲共白

遠村風霽柳先黃醉眠衙鼓何勞報晏起山衣自染香

可惜江鄉無好客玉驄空拂翠絲長

石苔岸草雨婆婆二月陰濃風未和急雨打牕聲暗碎

好花入夜落偏多曲調歌自留黃鳥書罷籠應換白鵝

畢竟煙江頭白叟輸他朝夕一漁蓑

自笑形骸三十年近來悟徹上乘禪一莖短髮先偷白

千結愁腸似湧泉憂說挪揄都在眼醉乘豪邁欲含天

浮雲滿目歸何處曳杖尋碑過別川

溼霧籠煙半未明柳條吹雪曉來青齋前夜雨生春草

城角漁燈間暮星花老遺鬢留蛺蝶水平流片立蜻蜓

東風日薄簾櫳外香結枝分紫白丁

惱恨飛花踏作塵無端易感過殘春誰家樹畔留餘曲



何處苔痕展溼茵脫帽解言非俗吏持杯笑說是閒人  
應誇彭澤為前夢自號文房作後身  
草沒新泥屐齒深閉門高臥看朝陰節當寒食風兼雨  
竈乞新煙火似金索米朝饑能作帖擁衾暮冷卻成吟  
一官辭去渾閒事但誤南沙雪滿林

喜晴

厭聽簷閒滴溜聲東風吹暖柳絲輕蝸牛上壁黏涎斷  
蝌蚪生池傍水行每憶看花當穀雨如今愁臥過清明  
閉門一枕梅巖畔無數春禽報曉晴

梅二首

竹裏梅花竹下樽東風吹入澹無痕憑誰貌得林逋卷  
晴雪漫天晝掩門  
花向春前一樹開酒當人別百杯催持杯莫使花零落  
曾見梅花五度來

罷政臨行畱贈餘父老二首

白雲大令罷官回父老依依為把杯拭淚欲隨予共去  
攀轅猶祝我重來晴山兩岸征帆穩雲樹千重廢驛開  
若問使君遺迹在南沙曾訪百株梅

東風獵獵送征車耕者爭看盡廢鋤半郭湖山新雨後  
三杯別酒曉寒初琴無鶴伴惟書共馬遣童行有鹿俱

去去非難稍嘗味石山春後問何如

北蘭寺次潛江朱悔人壁間韻示澹公四首

春溪雨漲棟花村莎草斜陽掩寺門綠筍傍簷寒玉骨  
紫雲垂地返香魂連江收網漁燈出遠浦停帆水氣昏  
邀我定禪高閣畔舊遊應許對牀論

雲冒前村失故山臨風遠睇獨茫然就中卽景知吾道  
此外逢人不語禪沙際草連智井沒竹間苔護石牀眠  
詩囊酒椀隨身便好遇洪厓爲拍肩

煙際征颿水際村西山霽色恰當門鳴榔偶過曾題壁  
隔浦相思有夢魂薄暮鷗盟時上下空江雲態倏明昏

章門十九年來事今日重逢與細論

澹公卓錫  
十九年矣

傷心吳楚舊江山兩世遊蹤思悄然何意長年耽薄祿  
未容此地卽逃禪幽篁綠滿當檐暗高柳陰濃傷水眠  
獨懺昨非依佛火打包明日願隨肩

東歸別澹公用漫堂先生過北蘭韻五首

曲圃迴岡夏木幽竹梢蕉卷傍簷抽山僧持佛空亭坐  
目送斜陽天際流

荷浦迎風五月涼今朝別爾布帆張秋來若箇聽寒雨  
爲剪溪雲製芟裳

溼翠漫空紫雪團禪扉石塢暮光寒趁船東下煙江遠

負爾招尋檻外看

堂懸羅叟

飯牛

煙江畫我挾歸橈好入圖兩岸荻芽風

冉冉一江帆影雨蘇蘇

長江挂席向東行心逐鷗鳧伴水輕回首西山飛鳥外  
落霞孤嶼遠難明

過彭蠡湖三首

挂席揚舫下蠡湖便風不似馬當途鐘聲林送東西寺  
帆影峯開大小孤揮手歸心先朔鴈掉頭詩思寄江鳧  
明朝若過柴桑里十載山川問訊無

艤舟湖畔上匡山刺史風流尚可攀

憶丙寅夏事

憶昔游蹤

渾似夢如今心迹剩來閑雲開廬嶽千峰曉潮打江城  
四月還惆悵春風送歸路舟行最好夕陽間

澹雲當曉隔江潯檻外清波百尺深雨洗野鷗閒拍岸  
水侵枯柳不成林帆依城郭移寒影牕對湖山有遠吟  
羈客遷游來此地當年奚笈費重尋

送朱秩公同官歸雲間二首

滕王閣畔送行幃莫歎經年宦思淹去就無憑惟子共  
浮沈何意向天占歸裝漸整先驪唱

先子南歸

行色何息拂

酒帘應爲尊鱸暫縈念秋風吹起客愁添

累從薦剡列名中而我遭逢本是同

當事以秩公行取子保薦俱因漕議

未廣也有才如命少唐歟未老豈時通雲山有約堪消  
夏牛馬頻呼只任風遲爾秋高薊門路故園泉石未從  
容

望匡廬四首

匡山予舊識重過若為情煙霧藏飛瀑峰巒出晚晴詩  
懷比江遠官況與舟輕五老高何許雲深恐未明  
謝政歸帆穩遭遷夜夢恬詩編琴閣集山憶梵杉寺巖  
半壁雲峰誤連湖晴雨兼晚來鐘寺近涼思亦徐添  
五載江湖畔沙鷗遠未親今朝對山色方說是閒人雨  
歇翠方出晴初溼未勻帆輕風更駛回望隔江濱

秀色分天半涼思接水間好風能送客殘雨欲歸山棹  
唱當流急雲峰伴我閒谷簾泉湧處高絕許誰攀

泊舟青山大風雨後望匡廬得二百字

閒時愛廬山徒作夢遊想官衙祇蝸廬畫壁供偃仰簿  
書畱五年煙霞遺一杖無緣遇山靈攫舟任來往石虹  
芝嶺間佳景亦勉強斯山峰最奇秀色乃真賞猿鶴責  
前盟謝政一過訪匣中寒雙峰雙劍水際輕五兩嶺頭

披絮帽樹底飛鶴髦天際金芙蓉花開高十丈雲峰一  
一浮返影照銀盞把酒向山言百山爾為長如何夕嵐  
陰頓失朝氣爽夜半雷殷鳴風雨極蒼莽遂疑巖谷間

恐復恣颺羈游天浮客相對殊惘惘南風翔太虛殘  
月亦徐朗酒酣快臨波吟詩已盈掌推篷見湖色天風  
追浩蕩五鼓發棹謳鐘送東林響

青山桃花庵二首

殘雲扶雨過江干滿地松花石磴寒身到青山一回首  
匡廬還在霧中看

屋角千章夏木清四山風靜鳥無聲草香徑溼路難辨  
澗底閒雲引我行

石鐘山山響樓二首

一舟攬盡匡廬勝三日舟行問寶鐘寺名石挾濤飛翻凍

雨閣臨雲近倒危峰江山瀕洞萬聲出天水蒼茫九派

從惆悵當年舊遊地斬新百二養蒼龍山有百二松亭  
觀察公所建

緩步登樓俯碧湍天風吹浪響空山欄前五老峰明滅  
足底千巖聲往還雨過魚鰕多上市舟輕琴鶴亦停關  
歸來愛取江頭石不似西山一味頑

泊湖口便風不得行

布帆無恙下彭湖似展雲林水石圖人未才憐驅險路  
天猶風便送征途江同湖漲連潮白日落帆檣與鴈孤  
極目響空樓上望章門雨暗白門蕪

石鐘山下聞水石相激聲

天風起天浪瀕洞萬壑聲雲鳥互往來水石相喧爭何  
年鑄此錯終古怨不平三歎獨徙倚寂寞空山聽

江行雜咏八首

斜陽挂席下煙汀五柳先生有廢亭看罷欲吟歸去句  
小姑山色又含青

帆輕回首失彭郎過眼舟行下馬當今日到來風亦便  
莫將詞賦擬滕王

蘆荻蕭蕭風暗來繫舟沙渚鳥飛迴江南故里來歸客  
市酒如餉且舉杯

泊花揚鎮

皖江城外接流湍蘆屋江聲五月寒捩柁東來纔一日

九華山色暮雲端

太子磯頭夕照明螭磯廟下水波平十年不趁江船去  
今日重來記姓名

野苔沿岸花先發枯柳傍堤根已敲拍拍鷓鴣衝霧去  
夕陽初下水神祠

五色龍鱗落照中萬人金鼓暮江東石頭城畔浪花湧  
猶想當年老阿童

建業觀  
競渡

之字風帆盡日行剪江還趁日西平騎鯨人杳歸何處  
潮打空祠缺月生

秣陵感懷

江上墟煙鎖故宮寒潮夜過白門東百年舊恨誰能說  
只有寒螿泣晚風

端午遊報恩寺九層塔用東坡端午徧游諸寺韻  
六朝興廢地終古暮雲連落日吹紈扇輕風散淨筵愛  
從高寺迴一望遠山妍草木寒陵舊雲霞廢岸然石欄  
誇十二時代易三千揮翰飛雙白御書拈花散九天登  
塔寧有阻探頂亦差便碧甃涵秋鏡丹梯結篆煙看山  
持拂數籍地近雲眠涼月歸舟靜枯燈獨倚禪

白門懷古三首

六代繁華遺恨多興亡淹忽奈愁何形分吳魏天爲塹

地擁徐揚水碾渦揮塵空山誰北望濟江中夜有高歌  
深憐終古秦淮月送盡東流歎逝波

梁王舊日有臺城城上遺蹤盡杳冥鴈塔諸天雲外見  
猿經深夜石間聽楊枝不灑凌霜鶻忍草時飛近曉螢  
野老來扶藤杖看雨花山色幾重青

結綺臨春好在不當年行樂已東流埋香甃缺苔生井  
惜玉人歸燕入樓聞道從臣皆握管可能天子正無愁  
宣華門外韓擒虎回首還憐土一丘

蚊

維舟宿城南岸草積盈尺石流膏自煎壞牀苦偏窄蘊

隆一氣內白汗浹流席殷殷聞雷鳴深夜勢相迫足高  
色殊斑頭銳利若戟翅飛旣誇便嘴擊不暫歇驪黑種  
各異水草性善映未來先作聲旣至不復適呼羣語惜  
惜引伴來窸窸潛伏跡甚秘隱飛肥可擇集處使面頰  
擊時更手炙情已慘剝膚眠難穩壓魄急因持扇揮擾  
或遭指摑衾裯遜薄單角枕徒轉側紗明蕩若空雲遠  
薄還隔意彼禍患無幸此厄難釋慮巧雖千周計疎遺  
一隙窺伺生虎耽伎倆笑鼠嚇攻堅破鮫綃肆禍在牀  
簣掩襲不及防虐害任所突譎詭又過蠅鋒刺堪比蠍  
惡竟徹夜昏毒不論肥瘠摧殘已及身刻削又到骨假

寐尚怵怖入夢猶恍惚昧爽涼氣清凌晨曉日白奄忽  
俱逋逃周視多屏迹白戰相驅除秦宮大搜索執魁及  
遺黨數罪難擢髮高枕爲吾廬人生貴安宅如何恣啖  
噬延禍及肘腋孰知理相尋陽升陰則沒置此焉足道  
事更有堪惜寄語世間人陰賊亦何益

迴文詩二首

新雨寒花蝶影香遠天歸夢曉茫茫  
馴鷗伴水歸斜渡  
勻柳吹煙籠短牆

鈿花插鬢晚妝新月夜濃香暗立身憐汝只題新寫句  
牽子獨夢隔花津



桃葉渡

桃葉渡頭雙槳輕竹枝歌裏一聲清石城艇子歸何晚  
悵望春江潮水生

東歸口占六首

脫箝老馬初辭櫪解纜輕舟任水移何事栖栖觸熱去

為人官職亦堪嗤

白詩始知官職為他人

當場得失笑瞻烏慚愧餘民罷釣屠百首新詩壯行篋

歸來亦可答妻孥

秉廉持節吾儒事何以今時歎絕無自解公餘差快意

五年曾讀兩牀書

南沙梅萼白溪蓮晨夕探游已五年勝事從來多代謝  
祇應跌坐學安禪

江山亂後剩空祠闢地誅茅位置宜遺版畱傳好收拾

衙齋讐校亦多時

胡敬齋張古城兩先賢予為葺祠梓集

長卿

劉

才調猶寥落山谷

黃

文詞亦左遷似我遭遷真

分耳兩公還喜結前緣

秦晉屢蝗居民流竄

特詔蠲租發帑金百萬遣重臣賑濟喜聞恭紀二首

聖主憂民布澤長盡回寒谷返曦陽九天雨露多西土

萬鎰金錢赴朔方事較吞蝗尤豔說史稱禱野是誠禳

頻聞恭已傳明詔九曲河流起赤魴  
華潼東下盡遺氓悵望歸鴻獨北征  
野哭吞聲河兩岸暮啼淒夢月三更  
深宮徹樂思勤政驛使乘輅過列城  
想見周宣雲漢什尹樊曾否荅昇平

秦淮曲五首

乳燕低飛霧澱生莎痕剪似鴨頭平  
輕陰嫩靄長干路畫舫已猶竝出城

十番細打不曾停度曲將終倚棹行  
怪底風來香不辨雲鬟瞥見玉梳明

涼篷船小疾如梭添得紅欄映綠波  
一道笙歌堪入耳

石城橋到下新河

小海歌翻賽水神湘簾霧縠暗遮身  
晚風催蕩迎潮槳月影波光照玉人

燈棚逐隊數秦淮珀合晶毬各色排  
端酒幾曾求市肆江鮮新上小銅街

江行有感

江天舟行江日微水侵洲渚蘆攢磯  
低飛疾飛水鳥過深色澹色春雲移  
隨時得句有新意任運作達無危機  
人生羈游只暫耳寒暄屢變將何依

晚眺二首

幽景羈人得詩懷  
野外尋林梢高見日  
池面密含陰疎  
快空江夕低徊望國心  
晚風寒短袂緩步卻成吟  
江岸茅簷穩招尋  
羨爾家秋帆停戶牖  
漁艇出蒹葭  
雨脚寒欺日山腰暮起霞  
橋邊空佇立矯首數歸鴉

雨過二首

雨脚連山沒風頭傍水生  
秧添新柳色蛙滿舊池聲  
舉酒不辭量停帆擬欲行  
不期人厄處物外有閒情  
晚翠依山出春潮接水生  
荷香知別浦棹唱識吳聲  
沙際雙鷗沒壠閒一犢行  
石頭城畔路風物總關情

避風館望金焦

避風館北曲廊東盡攬江山入望中  
簷外金焦高下寺  
欄前帆櫓送迎風波紋蕩漾生虛白  
塢影微茫辨小紅  
到眼兩峰纔咫尺真如手弄玉芙蓉

丹陽舟次

牧童圍坐學吳歌  
草岸斜陽牛背多  
官舫丹陽城外路  
歸人此日又經過

據梧詩集卷七

鷗馴集上

壬申夏日自江右歸里門次胡芋莊韻

宦情蕭摵筆鋒酣半格詩裁得共參

偶談香山半格詩

客路抽

身歸里社年華到眼歎驂驪從容文酒陶元亮潦倒情  
懷殷仲堪猶喜故交勤倡咏分題敢謂鼎成三

附原韻

胡香昊 芋莊

香薰涼飲快清酣容易空堂笑語參便酒輕衫非襪  
襪催人征馬佇驂驪江天蓬鬢當時在文字金荃此

日堪茂宰琴聲方妮妮別來歲月訝重三

高郵道中三首

長堤短堤楊柳深浦淺浦荷花鳧鴨陂塘上下帆樯戶  
牖橫斜

藕臂香泥未洗蓮房宿雨纔開一片酒旗樓角千家燈  
火城隈

風起芟蘆積翠雨來楊柳添陰淮瀆廟前偶立露觔祠  
下閒尋

沂州旅次

遠渚天空淨危橋水急湍店通沙岸白門倚柳陰寒雨

漲漫停馬途長促蓐餐飄蓬事奔走殘月馬頭看

半城七夕二首

馬上曝書時捧腹驛亭漏月見銀河夜闌索筆去題壁  
匝樹鵲飛南去多

坐久涼颼秋意多洗車浪說鵲橋過關心客裏逢今夕  
惆悵離人也渡河

齊魯閒雜詩三十首

亂石圍牆掩葦門數家雞犬亦成村山花雨過依然好  
枯柳風多半不存沙水細流當路出棗陰垂實隔枝繁  
行行不減江南意只欠輕舟送酒尊

長亭十里望炊煙乞火分茶欲曉天野寺尋碑今半仆  
溪橋投店已頻遷菰羹硬餅家家饌葦席敲牀草草眠  
猶記衝寒朝策馬谿山踏雪故依然

日到前山雨到溪花生斷岸草生堤隔村籬犬自相吠  
近午荒雞還亂啼得得馬蹄頻入夢涓涓沙渚不沾泥  
停裝早飯煩村叟小摘盤餐繞廢畦

依然襍被上長安檢點征衫敵暮寒萬事局終看一著  
九迴腸轉到千盤遭遷自笑非能吏觸暑誰爲候熱官  
酒椀詩囊長日共醉聞新政慶彈冠

雲斂嵐陰澹欲悲山村水郭正迷離蓬門雨過瓜香候

野店人眠飯熟時霧氣半遮峰頂沒溪聲偏接馬行遲  
長年剩有探遊興辛苦征鞍亦未衰

黃茆店子亂岡頭冷粉甘瓜晚未收日午乍暄猶似夏  
曉煙如霧倏成秋野花帶雨方啼恨路柳牽人未解愁  
不把新詩漫題壁年來生怕是重游

何處風光最斷腸悲秋況復是他鄉雨荷宿鷺翻珠蓋  
風柳催蟬送夕陽道上新碑畱姓氏

途間皆立  
頌政碑

壠間舊

豕散牛羊行行遠趁歸鴉集野店敲詩獨倚裝

遠岸沙痕白道齊夕陽斜下草萋萋疎林密樹遮重路  
後嶺前山共一溪拂拭敲牀成鷺宿憑依羸馬笑雞栖

秋風古驛齊州道送我行行渡水西  
五更燈火照柴門匹馬西風易斷魂  
咿嘍筓輿聲裏夢微茫茅店驛前村  
人高詩苦誰嗟及天厄途岐慎莫論  
只有舊時官道柳勞勞笑我幾多番  
蹇驢襍被一身輕過盡山城與水城  
馬上倚裝看曉黛林閒過雨出新晴  
溪流漾月清於晝蛩語依牀說到明  
未信年來孤館裏思鄉歸夢有人成  
雲山半月未曾開笑指行人晚渡來  
病馬屢停郊外寺征衣難拂驛前埃  
溪聲急下前村雨嵐氣陰催隔岸雷  
極目南天歸去鳥殷勤倩爾附書回

四山風靜寂無聞野蝶隨花自作羣  
到眼溪沙都閃目現身峯頂不遮雲  
陰晴澗壑隨時變齊魯川原入望分  
濁酒一尊當落日漫將感慨號能文

十丈征塵馬首飛看山佇立獨移時  
江湖別去愁中老詩酒拋來夢裏疑  
官路泥深因雨積驛門槐秃受風欺  
蕭條氣味悲秋意只是關情客子知

入秋天氣半陰晴冷暖無憑客夢驚  
棗葉雨餘光有色蟬聲風定咽方鳴  
他鄉景物看來慣當暑衣衫著漸輕  
極目搖鞭吟絕處齊山依約魯山橫

聞道層樓結綺霞海天極目碧虹遮  
雪寒六月飄靈瓦

雨灑諸峯望翠華  
輿裏看山時向背  
醉中作字半敲斜  
東來五日歌行路  
處處溪流送野花

悲秋何處惜離羣  
僕僕征途易夕曛  
水別河淮流自合  
地偏齊魯勢全分  
入村有樹皆垂棗  
近岱無峰不出雲  
沽酒倚裝催好句  
漫嗟車馬日紛紛

無賴餘寒夜半生  
酒醒孤館客心驚  
馬蹄送盡三秋夢  
蛩語啼殘五夜更  
冷暖不聞看變態  
廉隅何補只虛聲  
無須漫說當場事  
優孟高歌早已成

三十已過四十催  
人生懷抱何由開  
一秋半作遠游客  
六載兩渡黃河來  
白日荒荒迷遠浦  
馬蹄格格吹輕埃

燕齊邾魯行欲徧  
弔古感時良可哀

江臯回首望中虛  
廳柏虬枝暮景初  
五載湖山還若此  
三秋况味近何如  
雙旌遠下來新雨  
孤館重遊檢舊書

叨從南樓清咏夜  
煙江渺渺正愁予

憶從中丞宋公倡咏勝事

勞勞送客野花開  
茅店山橋首重迴  
明月每從殘曉望  
好風還怕捲塵來  
入秋門巷垂瓜棗  
傍舍陂塘沒草萊  
積雨霽光應更好  
年華又惜旅中催

荒村薄酒不須沽  
醉裏羈愁只暫無  
倦僕觸屏鼾曉夢  
病驢銜轡戀餘芻  
車行九坂雙輪疾  
路入三叉疋馬孤  
日暮西山相對望  
紅塵隱隱集啼烏



秋光到眼總堪悲  
幽景先從遊子知  
冷驛停裝閒秣馬  
亂山卸馱獨敲詩  
畿郊新闢郵傳道  
官路爭排頌政碑  
始信江湖憔悴客  
迂疎原不合時宜

擊筑燕歌易水哀  
無須北望說金臺  
空吟蔓草露零露  
誰解幽蘭委廢萊  
買駿幾人求異骨  
獲麟終欲比凡胎  
應知汲黯匡時策  
不及弘羊治賦才

聞道南山徑可依  
西郵車馬日駢駢  
辨才何待歲年久  
論馬止須肉相肥  
天上星文增粉署  
關中遊侶盡緋衣  
嗟予獨臥滄江穩  
飽看雙虹願又違

漏天淫雨已兼旬  
策馬長途屢問津  
破研倚裝聊寫句

荒村偶伴結為鄰  
壁間憂思兼歡思

任丘道間題壁詩  
一賦歸隱一誌赴

道上新塵接去塵  
無賴村雞偏解事  
三號殷切報行人

人

詩情潦倒病愁兼  
自笑年來客思淹  
急雨打頭遮破帽  
亂塵撲面蔽行幃  
酒漿上市濃如粥  
瓜菓登盤蜜樣甜  
添得雨餘三尺水  
河橋垂柳拂青帘

秋氣蕭條入望空  
傷橋微徑遠村通  
行人交轡綠陰下  
野馬互嘶寒草中  
漠漠麩花初試白  
毳毳棗實半垂紅  
征途詩思堪收拾  
莫比浮塵說塞翁

軟紅馬首晚來增  
到眼陂塘勝踏冰  
風起一池荷顫顫

雨斜千樹柳層層  
眠陰乳鴨時衝浪  
伴水馴鷗遠避罾  
猶憶白溪尋舊賞  
釣徒詩侶夢難勝  
干越白溪荷  
芰二十里  
短垣衰草暮啼鴉  
鞭指前村薄靄遮  
箬笠壓檐欺赤日  
征衫脫線積黃沙  
迎風古驛千株柳  
過雨官渠兩部蛙  
笑語津亭候關吏  
又騎羸馬入京華

風雨經春作病魔  
衝炎捩柁溯江波  
歸來親舊歡娛少  
醉裏詩篇感慨多  
沽酒種花何日約  
放懷擊筑昔人歌  
夢回細數從前事  
香爇燈昏奈爾何

望岱

維皇孟秋月驅車向齊州  
陟山登蒙嶺渡水來沂流  
驅

馳及兩月勞瘁當三秋  
頗足巖穴趣詎起離索憂  
雨積泥沒袴水漲波侵輶  
溪山靡有盡眺覽寧當休  
今晨望泰岱青翠空中浮  
鄒魯瞰視小燕齊極望幽  
遠如綠芙蕖翠削金雕鏤  
亭亭雙峰間滅沒寒雲稠  
近山益屢巖怪石眠駝牛  
微茫辨鳥道煙雲兩目收  
緬茲東土鎮明堂垂旌旂  
羣后秉軌度百方職貢修  
祈年禱必應秩禮崇多優  
非以矜侈大豈徒壯觀遊  
降自秦漢代好大喜功謀  
東行封禪議作事後先侔  
相如有遺篋李斯存篆籀  
寂寥千載內功業隨蜉蝣  
空餘古松柏雨露枝相樛  
因知石碣堅不及草木柔  
血肉苦凡體何方脫絛鞣  
僊

人碧幢蓋濯濯雲山陬閒折松樹枝長嘯駕赤虬朝行  
泛三山暮歸宿十洲俯海橫略約踏嶺栖之采天雞忽  
鳴曉海水翻晶球回視千芙蓉返照色紺緌當年有徐  
福童女三千求何年得真訣去向長安投山靈忽掩闕  
好景難終畱海雲積巖嶂咫尺風雷愁相望不相接臥  
聽聲颼颼

平原道中二首

青驪兀兀撲塵過危坐籃輿獨咏哦忽訝展書寒翠染  
平原夾道綠陰多

百道艱難剩此身年來貧病轉爲鄰買絲自取征衫補

世上今無可繡人

任丘次壁間韻

日落前村起暮煙暖塵撲帽不遮檐無情陌上垂垂柳  
送老秋風又一年

贈僧宛凝

僦寓招尋自昔年舊遊惘惘記難全春風粥熟迴廊鼓  
秋雨茶清廢竈煙羈客題畱重過此古槐陰覆故依然  
已公近葺茅堂好相過堪吟杜老篇

次韻東周文邑

朔風候鴈正秋旻又脫征衫拂亂塵好友再逢還再喜

都城一到一番新重思十載栖禪話共作三秋感賦人  
比舍若添長句好墨蛟顛草莫辭頻

奉荅蔡立先廣文爲餘父老作遺愛碑文二首

湖山五載與君游旅食京華病過秋碑借中郎文綺麗  
交因鄭老夢勾畱白溪荷敗誰聽雨新渡梅遲憶放舟  
故老莫瞻雙柏拜署軒有雙柏使君無意下南州

天畔交情賴子親西風噩夢去何因憶從九日分籬菊  
何計三秋結比鄰松竹性貞期共老詩篇郵寫意俱真  
慚予五載荒城臥剩有遺碑感路人

送掌宸遊梁

對牀樓畔酒初醒四壁秋聲憶共聽勞我衝炎來帝里  
因君話別到離亭夸門日落墟煙紫官渡河荒暮雨青  
之子裝輕驪唱遠感懷篇什載遊軒

鴈字詩三十首同路蒼霖孝廉賦

燕市秋深暮靄重樓頭愁坐正書空蒼穹有恨憑誰訴  
大地無文賴汝工竺國重翻款塞譯燕然好勒破羌功  
誤疑陣鳥何因布運帚青冥倚朔風

隨陽歲歲到三冬沙磧同雲一色封雪上爪痕偏刻畫  
空中文陣想橫縱關河南渡書成冢戎馬西騰筆退鋒  
猶得一行傳舊事暮霞寒樹幾千重

旅食栖栖寄遠邦  
夜分哀語度幽牕  
連珠格法風爲演  
勒石才名鼎可扛  
夜讀黃蘆同宿火  
曉題丹葉伴歸艘  
憐渠獨抱凌雲志  
萍轉東西意未降

藏身八法竟誰施  
描畫虛空莫辨之  
競向陽和畱素牘  
爲商生計有微辭  
書垂學海同遊戲  
影過雲亭獨問奇  
霜曉秋旻多變態  
驚看天半下蛟螭

看從碧落下珠璣  
整隊衝風趁晚歸  
墨汁濡頭斜復整  
指痕畫肚是耶非  
烏絲斷素雲中沒  
玉簡傳空天外稀  
筋骨正須顏柳竝  
稻粱何用計豐肥

百堵書城是爾居  
噍噍又是賦歸歟  
應知以鳥紀官日  
恐是因繩結政初  
四海同文來鳥陣  
千年異篆勒狼胥  
偏傍點畫皆工妙  
不用迂生辨魯魚

天門鳳闕勢相扶  
文物昭迴入繪圖  
聊向是中知一二  
誰於此處點之無  
霜風落葉丹先見  
宿葦沈雲墨早枯  
咫尺題空飛天矯  
文章變化在須臾

整整斜斜散復齊  
法書草聖遠猶攜  
亂鳥合隊皆成點  
凡鳥畱門慎莫題  
宇下寄人嗤幕燕  
篋中遺帙笑家雞  
儒生亦作穿雲志  
遠寫青冥未有梯

雲移煙嫋篆文佳  
點染山崖與水涯  
好手白描誰得似  
名家墨戲定能儕  
驚飛麗句嗔排偶  
羞落殊姿比折釵

向晚蘆根洲畔宿紛紛書家盡堪埋  
捧函天畔去仍回五色卿雲向晚裁一畫圖書初啟秘  
千年文運劫成灰探奇華頂聲初度投筆衡峯勢欲迴  
憐爾文成無箇識等閒長自寄蒿萊  
蠆尾蠅頭莫厭頻遙從天際辨疑真清宵風雨相予汝  
終古江湖是主賓樹染霜痕丹未點雲烘黛色墨難勻  
自從倉頡成書後法意流傳別有神  
盤空筆陣掃氤氳下界鉤摹盡可焚苔長迹猶畱鶴篆  
池荒經不換鵝羣前馳追激遺雙羽後勁誇張盡八分  
身見北平飛健將故將書格號能軍

翱翔六翮勢高騫碧海青霄灑墨痕日下影聯看畫壁  
月斜行斷好題門迴文寫罷多成格真跡觀來了不存  
卻笑處堂悲燕雀羽儀文象幾曾論

千里長征刷羽翰但爲書易莫書難臨摹鳥篆何辭夜  
鉤剔天文不憚寒屋角烏頭惟曳白庭除鶴頂獨書丹  
愁思萬疊和千疊還向虛空指點看

不用頻書行路難華峰代塞亦曾攀經傳鳥跡何由辨  
文起鳩皇不可刪遣撥情懷惟筆墨逢迎旅次有雲山  
從今莫漫題空去寫出邊愁唱玉關

浯溪片石待磨鐫八體濃纖法格全千萬牙籤縹鳥篆

十三箏柱舞湘絃書成似一飛非一過處彌天卻寫天  
極目家園芳信杳是中幽意倩渠傳

關門寒雨正蕭蕭容易成書漸亦消運腕天衢誇筆力  
吮毫銀漢湧文潮隨風後陣還迤邐作勢前軍更抹挑  
歲歲常過楊子宅捲簾天際下瓊瑤

豈惜文成遜九苞于磐上六是占爻蟠迴已欲追軒頡  
寒瘦還如讀鳥郊去去霧迷如隱約行行風急任推敲  
樓頭閣筆時相望盡日奇文手自鈔

墨花如斗灑空霄箋懇天公盡日號譜入拍笳調錦柱  
繫來書帛落霜旄禽經夜註拈湘管鳥迹晨臨吮雪毫

纖羽紛紛俱屏卻雲山萬疊一行高

參差前隊學揮戈露布飛章盾鼻磨溼霧障天看去少  
濃雲潑墨寫來多清宵星斗文同象盡日呶吾語竟訛  
祇爲書懷略工拙黃庭應不換籠鵝

斷簡零紈間整斜音函珍重夢辭家天池蘸筆雲生肘  
榆塞裁書墨帶沙碧落無須嘲點疥黃昏應共笑塗鴉  
一聲嘹唳常聽曉驚破江郎夢筆花

畏因霜冷競隨陽歲歲秋深示一行懷刺多門勤執贄  
登雲有路服成章窮愁嗟爾丹鉛老蚤晚輸君甲乙忙  
好註禽言三百卷樓頭盡日永相望

三四近事

薄暮相看每未明，遙同北斗掛邊城。  
五更殘月留餘影，半夜孤燈隔去程。  
原上鶴鴿供作帖，波間鳧鷖自要盟。  
憐余覩物因成感，江海飄零少弟兄。

一自新霜下北溟，揮毫落紙幾曾停。  
河荒地遠疑飛白，秋曉天空付殺青。  
何事愁中書咄咄，嘗從雲外去冥冥。  
行題多少愁多少，矯首看來又細聽。

代塞曾過第幾層，勞勞草澤帛書徵。  
木蘭調短聲徐減，楊柳行疎勢更增。  
嶺上晴雲飄蜀紙，江間新漲剪吳綾。  
紛紛過影須臾事，多恐文工造化憎。

天涯何處有書郵，檢點封題夜未休。  
勢最精嚴誇鐵線，形多迴互說銀鈎。  
體兼八法工摹勒，格寫千行費校讎。  
歎未曲江題塢去，殘編禿穎瘞荒丘。

客途寥閨有微吟，絕塞書來急暮砧。  
常爲銜蘆工草法，慣於遵渚作池臨。  
隨風落處行疎密，帶霧開時墨淺深。  
細錄鍼鋒相問難，好辭誰爲解碑陰。

遙天木葉下江潭，天外音書取次探。  
剝落篆文渾未辨，整斜真草亦相參。  
當空對影看奇偶，最後孤飛有二三。  
曾向公孫學劍舞，折釵屋漏與爭擔。

望爾飛飛客思添，江村搖落共青帘。  
雲山南去迷千疊，筆墨飄來易一縑。  
漸象占爻傳陸羽，縷文退筆弔蒙恬。



秋深對景偏清切感物傷懷兩淚兼  
天邊尺一詔徐頌稽首彤雲啟玉函南去孤帆齊落影  
北來芳信未開緘從風應候聲歸塞算權當關蘆尚銜  
不到峒嶼比古篆迴峰自古說衡巖

京師見賣梅花者用宛陵集中韻五首

東風帝里原先入長恨春來少此花曾藉何人噓假力  
知非故土莫爭誇

前年新渡報春迴照水驚看千樹梅溼霧直和溪上月  
團成香影到深杯

而今寂寞想籬傍野渡人歸插帽香三百十三寒樹老

春風不為挽年芳

千越南沙古梅  
共三百十三樹

兩三素萼緇塵裏輸卻橫斜傍竹扉莫似越人僑北地  
春風小任便忘歸

霜欺雪壓多虧日紙室油牕伴過年何似吾家山放櫂  
僮肩酒榼杖攜錢

歲暮雜感用錢牧翁消寒韻十二首

五年浩劫得閒身宦迹微茫筆視親機局靜參惟白眼  
形骸自笑只烏巾庭閒瘦影分鄰樹篋檢書行半故人  
蕭緘漫嗟時序晚近天猶喜列堯民

半甲全過老漸增閉門朝坐抱凌兢人誇巧慮千無失

自笑迂疎百不能車走雷聲塵積室風窺牕紙硯含冰  
晚來警枕南行鴈知過家山第幾層

北風灰洞射眸昏爽氣俄看翠欲捫零落故交悲聚散  
延緣世態尚寒溫西山有鳥虛填海南國無香可返魂  
歷歷舊游俱在眼破牕擁被與誰論

懶向泥塗問醉醒充籛曾說勝遺經誇渠風便爭登岸  
訝爾天空徧列星夢裏蟻軍封爵幻靜中蛙吹鼓歌停  
閒牕穩臥三竿日萬事從今只眼聽

莫向當場說塞翁由來猥巧勝頑聾雞蟲得失干何事  
牛馬稱呼只任風眼爲怯塵愁向北身因負日每依東

寒牕鉛槧冬菹美拂袖江亭豈少功

雙虬暮雨聽寒秋秀壁巉崖屋角搜世路飽諳傷九折  
津亭小住號三休湖山到眼猶勤訊琴鶴隨身未易謀  
莫向江臯問流水百年遷客半南州

一榻翛然抱百憂戒將肝肺學雕鏤荒原病馬初辭轡  
斷渚微波不繫舟忽爾風沙疑絕塞偶然花鳥卽林丘  
憑高雪暗雲浮處汗漫重來作舊遊

枯碁失著又翻新斂子推枰盡主臣九轉神遊還此日  
一時仙蛻屬斯人輕裘寶馬逢連璧羅綺笙歌正百巡  
容易春風忽惆悵空傳索駿按圖頻

江雨芳信一何遲日暮愁兼黯黯思桃葉水漂誰度曲  
柳絲風急不成眉春迴小苑花爭出夢斷油車燕未知  
好在天涯歸驛使隴頭新寄折梅詩

支離常自笑經年束糗燒船却鬼纏大庇志存寒士厦  
良籌日計水衡錢三間老憶灑西屋二頃貧輸洛下田  
風物艱辛人事異昏昏只合擁書眠

瓶花日曬解寒冰睡鴨香銷暖未凝鳥誤月生驚起樹  
鼠憎人語暗窺燈良朋別久詢暄冷弱女書來問寢興  
寂寂江鄉來眼底滿城殘角夜愁增

鴈字賡題潑墨催敲詩除卻卽銜杯荒街刻盡漏徐轉

禿樹夜寒風暗來似此光陰當歲晚不禁懷抱又春迴  
吟思半入鄉思苦酒罷誰爲歌莫哀

送華陰王宜章之官眉州

青衣江水接天無仙宰之官赴蜀都聞說梅花千樹在  
曾傳明月半輪孤晴雲自傷東西岫遺迹還尋大小蘇  
若把華峰比峨嶺未知山色更誰殊

臘月二十日用宛陵和景彝閏臘二十五省宿

韻

翛然閉閣抱凌兢破硯輕綃暗結冰隨手年光何草草  
舉頭雲葉看層層荒街殘角依寒吠獨夜昏星出遠燈

明日盧師同振策報書先擬訂山僧

壬申除夕用東坡除夕贈段屯田韻

勞生數週甲今日又過半其間計所歷隨事雜歡歎年  
光如逝水過眼不堪玩朋儕如浮萍偶聚忽復散五年  
困簿書鎖印尋老伴朝衣寒似水問夜坐待旦拂衣走  
江湖此事已前案芒屨踏京華短髮秋蓬亂缸花照夜  
眠研水備晨盥南山幽徑捷攬轡一何緩攫食爭鳥飛  
戒進恧魚貫春城春酒釀歡飲起愚懦椒花落辛盤列  
坐依爐炭侍飲有陽元江花飛別館天涯喜過從清齋  
得餘暖初日射西山明朝庶一粲



